

Երեսնամյա այսպիսի

ՄԱՅՐ ԱԹՈՒ ՍՈՒՐԲ ԷԶՍԻԱԾՆԻ
ԿՐՈՆԱԿԱՆ, ՄՇԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ

Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի ուղերձը Սուրբ Ասվաճաճի Ավեսման տոնի առիթով

Սուրբ Աստվածածնի Ավետման տոնը պե-
տական տոնակարգում հաստատված է
որպես Մայրության, գեղեցկության եւ սիրո
տոն: Այս օրը մեր եկեղեցիներում կատա-
րում ենք օրհնության կարգ՝ մայրության
բերկրանքին սպասող կանանց համար,
մայրանքով, որ Աստված շնորհաշատ զա-
վակներ պարգևի եւ լիառատ պահի սերն
ու համերաշխությունը ընտանեկան հարկի
ներքո: Հոգեւորոգ տոնի առիթով հայրա-
պետական Մեր օրհնությունն ենք բերում
բոլորին, ի մասնավոր՝ մայրության բերկ-
րանքին սպասող կանանց:

Այսօր մեր սուրբ եկեղեցիներից Աստվա-
ծածնի Ավետման հրեշտակաձայն ավետիսն
է հնչում. «Ուրախ եղիր, ով շնորհունկալ, Տե-
րը քեզ հետ է»: Փրկչի աշխարհ գալու բերկ-
րալի լուրը, որն առաջինը լսեց Սուրբ Տի-
րամայրը, նորոգել եւ օրհնությամբ է լցրել
նաեւ մեր ժողովրդի կյանքը: Դարեր շարու-
նակ այս լուսաբեր ավետիսով ոգեշնչվել եւ
գորացել է քրիստոնյա մեր ժողովուրդը, իսկ
մեր մայրերն ու քույրերը, օրինակ ունենա-
լով Սուրբ Կույսին, նվիրագործել են իրենց
կյանքը՝ ապրելով հավատքով եւ առ հայրե-
նին սիրով ու հավատարմությամբ:

Մեր ժողովրդի համար դժվարին այս օրե-
րին Սուրբ Հոգու սփռվածքն ու Բարձրալի
գորակցությունն ենք հայցում ազգիս բոլոր
զավակներին, ի մասնավոր՝ արցախյան
նոր պատերազմի կորուստների ու արհա-
վիրքների ցավը կրող մայրերին, քույրերին
ու դուստրերին:

Աղոթում ենք, որ Տիրամոր բարեխո-
սությամբ հարուցյալ Փրկիչը խաղաղու-
թյուն ու բարօրություն պարգևի համայն
աշխարհին, մեր երկրին ու հավատավոր
ժողովրդին: Թող Տիրոջ հանապազ պահ-
պանությունն ու շնորհները հովանի լինեն
մայրության բերկրանքին սպասող կանանց,
որ աստվածաշնորհության, հայրենասնվիրու-
նի ու ազգանվիրումի ոգով սնեն ու դաս-
տիարակեն իրենց զավակներին, եւ Աստ-
ված բոլոր կանանց, մայրերին ու քույրերին
պարգևի երջանկություն, բարօրություն ու
ամենայն բարիք, այսօր եւ միշտ. ամեն:

Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի ռասգամը մեր Տեւ Հիսուս Բրիստոսի հրաժափառ Հարության տոնի առիթով



Յանուն Դօր եւ Որդոյ եւ Դոգւոյն Սրբոյ. ամէն:

«Քրիստոս յարեաւ ի մեռելոց»
(Շարական Հարության):

Սիրելի բարեպաշտ հավատացյալներ,
Այսօր Սուրբ Հարության հրաշափառ տոնն է, տոն՝ վերհառնու-
մի, մեղքի ու մահվան հանդեպ հաղթության: Քրիս-
տոս հարություն է առել, բացվել է գերեզմանի դուռը,
հրեշտակները կյանքի լուսեղեն ավետիսն են բերել,
առաքյալները գորացել եւ ոգեշնչվել են հարուցյալ
Փրկչի հայտնությամբ: Սքանչելախորհուրդ Հարու-
թյամբ մեր Տերը՝ Հիսուս Քրիստոս, մարդկությանը
պարգեւեց գողգոթաներից հառնելու, մահին հաղթե-
լու եւ հավիտենական կյանքը ժառանգելու երկնային
շնորհը: Մենք այդ վստահությամբ ենք քաջալերվում,
նաեւ գոտեպնդվում մեղությունների ու վշտերի, մահ-
վան ահասարտու իրողության հանդիման՝ ունենա-
լով հաստատուն հավատը, որ Քրիստոս հարություն է
առել եւ նորոգել է կյանքը, դուրս բերել մարդկությանը
մեղքի ու չարիքի խավարից, հաշտություն հաստատել
մարդու եւ Աստծո միջեւ: «Աստված հավիտենական
կյանք տվեց մեզ. եւ այդ այն կյանքն է, որ Նրա Որդու
մեջ է», – ասում է առաքյալը (Վ Դով. 5. 11): Քրիստոսի
Հարությամբ բացվել է օրհնյալ կյանքի, հույսի, սիրո,
խաղաղության ու համերաշխության լուսավոր ուղին: Այս կեն-
արար ճանապարհից շեղումը հարության փոխարեն մահ ու ավեր
է սփռում, փրկության փոխարեն՝ դատապարտություն եւ կործա-
նում, կյանքը դարձնում ատելության, բաժանումների հորձա-
նուտ՝ լի չարի փորձություններով ու վտանգներով:

Սիրելիներ, անցյալ տարի մեր ժողովուրդը Փրկչի նմանու-
թյամբ վերստին կրեց խաչելության տառապանքը: Պատերազմի

դժոխային հնոցում չարչարանաց գողգոթա անցնելով՝ զոհվե-
ցին հազարավոր մեր սիրասուն զավակներ, կորցրեցինք Արցա-
խի՝ հարազատ հայրենիքի զգալի մասը: Ինչպես պատերազմից
առաջ, այնպես եւ հետպատերազմյան շրջանում մեր կյանքում
հաստատուն չեղան տերունապատվեր սիրո եւ համերաշխության
նախանձախնդրությունը, Աստծո պատգամների համաձայն կեն-
սակերպը: Պառակտումներն ու սերմանվող ատելությունը, անհա-
ղորժողության ոգին, շարունակվող քաղաքական այլեկոծումները
նոր ցնցումների ու անկումների վտանգի առջեւ են կանգնեցրել
մեր երկիրն ու ժողովրդին՝ ստվերելով նաեւ հայրենամարտի ու
ազգասիրության վեհ գաղափարները: Իսկ հայրենիքի անվտան-
գության չփարատվող մտահոգությունը, հայրենական կյանքի
տեսլականի բացակայությունը, հիասթափությունն ու հուսախա-
բությունը անորոշության խավարով են մթազնել ապագայատեսիլ
մեր հույսերը: Ոչ մի հանգամանք, ոչ մի նպատակ, ոչինչ չի կարող
արդարացնել ազգի ու հայրենիքի մասնատումն ու տկարացումը,
ազգային եւ հոգեւոր մեր արժեքների, նախնյաց ավանդների ու-
նահարումը, նոր սերնդի ապագայնացումն ու բարոյագրվումը,
ազգի արժանապատվության ու պատվի նսեմացումը: Մեր առջեւ
ծառացած քաղաքական, տնտեսական, սոցիալական բարդ հիմ-
նախնդիրների հանդիման, ճգնաժամային դժվարին հանգամանք-
ներում թաղման անձավի մեջ մնալով, իրավիճակից դուրս ելնելու
անհրաժեշտ գործողություններում հապաղելով՝ մեր խաչելությու-



նը չի պսակվի հարության կենարար գործությամբ: Հարությունը չի
կայանում մերժելի ատելությամբ ու թշնամանքով, բաժանումով ու
քայքայումով, այլ սիրով եւ հայրենյաց սիրո շուրջ համախմբումով,
մեղություններն ու դժվարությունները միասնաբար հաղթահարե-
լով: Մեր ժողովրդի կյանքը ի հայրենիս եւ ի սփյուռս սպասում է
վշտերի անհապաղ սփռման, չարչարանքներից հառնումի եւ
հաղթական հարության: Քրիստոսի պարգեւած փրկության եւ հա-
րության լույսը, սիրելիներ, ճառագում է զոհողություններ ստանձ-
նելու առաքինության միջոցով, զոհողություններ մեկս մյուսի հան-
դեպ, զոհողություններ ի սեր ողջ ժողովրդի: Այս լույսի ներքո է, որ
եսապաշտությունն ընկրկում է աստվածապաշտության առջեւ,
մահաբեր ընթացքը շրջվում է դեպի կենսատու Աստված, տառա-
պանքների մատնող գործողությունները փոխակերպվում են հա-
րուցյալ կյանքի արարումների՝ առաջնորդելով փրկության ու հա-
վիտենության: Մեր երկիրն ու ժողովրդին պատուհասներից վեր
հանելը, Արցախի կյանքը ավերներից բարձրացնելը եւ հայության
ու հայրենիքի վերածնունդը հրամայական հանձնառություն են՝
իրագործելի ազգի բոլոր զավակների, քաղաքական կուսակցու-
թյունների, մասնավորապես մեծագույն պատասխանատվությունը
կրող իշխանությունների կողմից: Հայրենաշեն ջանքերը կպսակ-
վեն հաջողությամբ օրհասական իրավիճակից պետականությունը
փրկելու նախանձախնդրությամբ, անձնական հավակնություննե-
րից հրաժարվելով, պետության ու ազգի շահը գերադասելով:

Ամենայն Հայոց Կաթողիկոսի Պատգամը...

← էջ 1

Այս ոգով հաղթական հանգրվանի պիտի հասցնենք մեր ցավագին կորուստների վերականգնման, մեր ազգային իրավունքների պաշտպանության, Հայոց ցեղասպանության համընդհանուր ճանաչման մեր նվիրական ձգտումները:

Սիրելիներ, Քրիստոս հարություն է առել եւ մեզ պարգևել զորությունը նորոգելու մեր հոգիները, մեր կյանքը: Չուսալքվենք ու թեւթափ չլինենք մեզ պաշարած փորձությունների հանդիման: Չորացյալ մնանք հարության հավատով: Հարության իրաշքը կենսագործենք մեր երկրում ու կյանքում: Զերմ իղձերով փարված մնանք մեր հարազատ բնօրրանին՝ մեր հողին, ջրին, մեր օջախին՝ կանխելու համար արտագաղթը հայրենիքից եւ հզորացնելու մեր պետությունը: Տիրոջ զորակցությամբ հաղթահարելու ենք մեր կյանքի դառնություններն ու արհավիրքները՝ հասնելով մեր հույսերի ու տեսիլքների իրագործմանը եւ հարուցյալ նոր կյանքի կերտմանը:

Հոգեմորոգ այս օրը աղոթք բարձրացնենք, որ Փրկիչ մեր Տիրոջ օրհնությունն ու շնորհները սփռվեն մարդկանց սրտերում՝ խաղաղություն եւ բարօրություն բերելով աշխարհին, իմաստություն քաղաքական գործիչներին՝ պետական ու հասարակական կյանքը կարգավորելու եւ բարեկեցության առաջնորդելու պատասխանատվության մեջ: Աղոթենք պատերազմում վիրավորված մեր զավակների առողջության, գերիների եւ անհայտ կորածների վերադարձի, մեր զոհված քաջորդիների եւ համավարակից մահացածների հոգիների հանգստության համար՝ մեր Տեր Հիսուս Քրիստոսի խոսքի մխիթարությամբ. «Ես իսկ եմ հարություն եւ կյանք. ով հավատում է Ինձ, թեպետ եւ մեռնի, կապի» (Հովհ. 11. 25): Թող Սուրբ Ջատկի հուսառատ ավետիսը հայրենաշեն երազների իրագործման զորությունը պարգևի աշխարհասփյուռ մեր ժողովրդին: Եվ թող Հարության արշալույսով զարդարվի երկնականարը մեր ազգային-եկեղեցական կյանքի, եւ խաղաղ ու ապահով մնա մեր հայրենիքը՝ Հայաստանն ու Արցախն աշխարհը, հավատքով ամուր, սիրով ու միասնական՝ մեր ժողովուրդը, այսօր եւ միշտ եւ հավիտյան. ամեն:

Քրիստոս յարեաւ ի մեռելոց,
Օրհնեալ է Հարութիւնն Քրիստոսի:

Ավագ շաբաթվա արարողությունները Մայր Աթոռ Սուրբ Էջմիածնում



Ունվվայի կարգը Մայր Աթոռ Սուրբ Էջմիածնում

Ապրիլի 1-ին՝ Ավագ հինգշաբթի, հանդիսապետությամբ Ն. Ս. Օ. Տ. Տ. Գարեգին Երկրորդ Ճայրագույն Պատրիարք եւ Ամենայն Հայոց Կաթողիկոսի, Մայր Աթոռ Ս. Էջմիածնի Ս. Տրդատ բաց խորանին կատարվեց Ունվվայի արարողությունը: Աղոթքների ընթերցումից հետո Ամենայն Հայոց Կաթողիկոսն օրհնեց խորանի վրա դրված ջուրն ու յուղը: Այնուհետեւ Վեհափառ Հայրապետը Պահպանիչ աղոթքով օրհնեց ներկա բարեպաշտ ժողովրդին, ապա, Աստվածորդու օրհնակով ծունկի գալով, շարականների երգակցության ներքո լվաց եւ յուղով օծեց մի շարք հայորդիների ոտքեր:

Նրանց թվում էին Մայր Աթոռի միաբաններ Մաղաքիա վրդ. Ամիրյանը եւ Հուսիկ աբղ. Սմբատյանը, արցախյան երկրորդ պատերազմի մասնակիցներ մայրո Ստեփան Ալեքսանյանը եւ սերժանտ Արթուր Իգիթյանը, Գետրոգյան հոգեւոր ծննդարանի սան Նարեկ ուրա-



րակիր Մաթոսյանը, «Եօրնեկեան» հանրակրթական դպրոցի աշակերտներ Սարո Արթնյանը եւ Նորայր Պետրոսյանը, արցախյան պատերազմում զոհված եւ անհայտ կորած քաջարի հայորդիների զավակներից Նարեկ Աբրահամյանը, Ավետիք Վարդանյանը, Լեւոն Մարտիրոսյանը եւ Սահակ Անդրեասյանը, Մայր Աթոռի «Քյուրքչյան» երեխաների աջակցության կենտրոնի սան Սամվել Ադոյանը, ինչպես նաեւ այլ մանուկներ՝ Սիեր Կոնյանը, Դավիթ Կուզիկյանը եւ Դավիթ Թադեւսյանը:

Արարողությունն ամփոփվեց Ավետարանի ընթերցմամբ եւ Ամենայն Հայոց Կաթողիկոսի աղոթքով, որից հետո օրհնված յուղը բաժանվեց ներկա հավատացյալներին:



Սուրբ Հարության ճրագալույցի Պատարագը Ս. Գայանե վանքում

Ապրիլի 3-ին՝ Ավագ շաբաթ օրը՝ երեկոյան, Ս. Հարության տոնի առթիվ, Ն. Ս. Օ. Տ. Տ. Գարեգին Երկրորդ Ճայրագույն Պատրիարք եւ Ամենայն Հայոց Կաթողիկոսի առաջնորդությամբ Մայր Աթոռի միաբանությունը ճրագալույցի Պատարագին մասնակցեց Ս. Գայանե վանքում: Պատարագիչն էր Մայր Աթոռ Ս. Էջմիածնի դիվանապետ Արշակ եպս խաչատրյանը:

Պատարագի սրբազան արարողությանը ներկա էր Հայաստանի Հանրապետության նախագահ տիար Արմեն Սարգսյանը, ինչպես նաեւ՝ Մայր Աթոռի բարերարները:

Մինչ Պատարագը կատարվեց ճաշու երրորդ ժամերգությունը, կարդացվեցին սուրբգրային տարբեր ընթերցվածքներ, որից հետո Մայր Աթոռի չորս միաբան սարկավագներ ընթերցեցին Դանիել մարգարեի թուղթը:

Սրբազան արարողության ընթացքում Արշակ սրբազանն անդրադարձ կատարեց Հիսուս Քրիստոսի Հարության խորհրդին՝ ի մասնավորի նշելով. «Քրիստոսի հարությունը վեճն է մեր հավատքի: Առանց հարության իրաշքի՝ չէր կարող իմաստ ստանալ Քրիստոսի գոհաբերությունը՝ չարարանքները, խաչելությունն ու մահը: Մթագնած երկնքում բոցավառվող արեւի պես է ճառագայթում «Քրիստոս յարեաւ ի մեռելոց» ավետիսը՝ բարի լուրը, որ դարեր շարունակ վերափոխում է մարդկության կյանքը:

Քրիստոսի անձնուրաց հետեւորդ, հեթանոսաց առաքյալ Պողոսը, առանց երկիմաստության, բովանդակազուրկ է համարում քրիստոնեական հավատքը՝ առանց Հարության իրաշքի ճանաչման: «Եթե Քրիստոս հարություն չի առել, — ասում է նա, — ապա ընդունայն է մեր քարոզությունը, ընդունայն է նաեւ ձեր հավատքը» (Ա Կորնթ. ԺԵ 14)»: Խորապես հավատալով Քրիստոսի հարությանը եւ դրանով մեր փրկությանը՝ նա գոչում է. «Ո՛ր է, մահ, քո հաղթությունը, ո՛ր է, գերեզման, քո խայթոցը» (Ա Կորնթ. ԺԵ 55)»:

Ապա սրբազան հայրը, անդրադառնալով Հարության նկատմամբ թերահավատություն եւ մերժողական վերաբերմունք ցույց տվող մարդկային մտածումներին, տրամախոհական միջոցով ի դերեւ մատնեց դրանց գոյության հիմքերը՝ ընդգծելով. «Այո, քրիստոնյաներն աներկբա հավատում են, որ Քրիստոս հարություն է առել: Հավատում են, որ Քրիստոսի հարությունը ոչ միայն միստիկական, այլեւ պատմական իրողություն է:

→ էջ 3

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց

4 ապրիլի

Եվրախորհրդարանի պատգամավոր Ֆրանսուա-Քսավիե Բելամիին

Ն. Ս. Օ. Տ. Տ. Գարեգին Երկրորդ Ճայրագույն Պատրիարք եւ Ամենայն Հայոց Կաթողիկոսն ընդունեց Եվրախորհրդարանի պատգամավոր Ֆրանսուա-Քսավիե Բելամիին եւ պատգամավորի գործընկեր Ժիլյեն Ֆրնաքվիլին՝ ՀՀ-ում Ֆրանսիայի Հանրապետության արտակարգ եւ լիազոր դեսպան ժոնաթան Լաքոտի ուղեկցությամբ: Նույն օրը՝ առավոտյան, ֆրանսիացի հյուրերը երեւանի Ս. Գրիգոր Լուսավորիչ մայր եկեղեցում ներկա էին գտնվել հայրապետական ս. Պատարագին:

Վեհափառ Հայրապետն իր օրհնությունն ու բարեմաղթանքները բերեց հյուրերին, որոնք հայ ժողովրդի համար նվիրական Սուրբ Հարության տոնի այս օրը գտնվում են Հայաստանում: Հանդիպման առթիվ Նորին Սրբությունն իր գնահատանքը հայտնեց Ֆրանսիայի իշխանություններին եւ բարեկամ ժողովրդին՝ բոլոր ժամանակներում ծանր եւ դժվարին օրերին Հայաստանին օժանդակելու եւ զորակցելու համար: Հայոց Հայրապետը հույս հայտնեց նաեւ, որ բարե-

կամ երկրների զորակցությունը կնպաստի տարածաշրջանում իրավիճակի կայունացմանը եւ արդարության վերականգնմանը:

Այնուհետեւ տիար Ֆրանսուա-Քսավիե Բելամին շնորհակալություն հայտնեց Նորին Սրբությանը՝ զատկական բարեմաղթանքների եւ օրհնության համար, եւ ընդգծեց, որ ինքն առաջին անգամ է այցելում Հայաստան եւ մեծ պատիվ է համարում լինել հինավուրց քրիստոնեական երկրում, որի ժողովուրդը Հարության հաղթական արժեքների կրող է:

Եվրախորհրդարանի պատգամավորն անդրադարձավ այցի նպատակներին՝ ծանոթանալ հետպատերազմյան իրավիճակին, առկա խնդիրներին, մասնավորապես՝ Արցախի հայկական հոգեւոր-մշակութային արժեքների պահպանության հարցերին:

Ամենայն Հայոց Կաթողիկոսը, հանգամանորեն ներկայացնելով արցախյան երկրորդ պատերազմի պատճառած վնասները եւ առկա մարտահրավերները, հույս հայտնեց, որ Ադրբեջանի սանձազերծած ագրեսիան եւ



դրանից բխող մնացյալ երեւոյթները կարծանաճ միջազգային հանրության եւ Եվրախորհրդարանի պատշաճ արձագանքին:

Վեհափառ Հայրապետը նշեց, որ սուրբ Հարության տոնին աղոթք է բարձրացրել աշխարհում խաղաղության հաստատման համար, մեր երկրի եւ մեր ժողովրդի հա-

մար, որպեսզի այս ծանր վիճակից կարողանա դուրս գալ՝ Հարության խորհուրդն աչքերի առջեւ ունենալով, ապավինելով Աստծուն, նախնյաց հավատքին, որ դարեր շարունակ մեզ դուրս է բերել բոլոր դժվարին իրավիճակներից եւ օրհնությունն ու ողորմությունն ավելացրել հայոց կյանքում:

Ավագ Շաբաթվա արարողությունները Մայր Աթոռ Սուրբ Էջմիածնում



← էջ 2

Հավատում են, որ Քրիստոս, հարություն առնելով, մարդկանց եւս հարություն առնելու շնորհը պարգեւեց. «Ես եմ հարությունը եւ կյանքը,— ասում է Նա,— եթե մեկը հավատա ինձ, անգամ եթե մեռնի, կապրի» (Յովհ. ԺԱ 25)»:

Արշակ սրբազանը նաեւ անդրադարձ կատարեց վերջին տարում Հայոց աշխարհին պատուհասած պատերազմին՝ նշելով. «Այսօր հազարավոր նվիրական զոհերի գերեզմանների առջեւ, անվերականգնելի կորուստների ցավերով համակված, ինչպէս ձայնակից լինեմք Պողոս առաքյալին եւ ասեմք. «Ո՛րք է, մահ, քո հաղթությունը»:

Մեր երազանքները խորտակված են թվում, ապրածը՝ իմաստագրկված, հազարավոր ընտանիքներ՝ սրտաբեկված, անհուսությամբ մշուշված է ապագան, եւ կարծեք, թե կյանքը վերածվել է անգատի մի պահեցողության: Ինչ-



կշիռքով, աղետն ու հիվանդությունը նրա համար փորձություն են, իսկ ծախորդությունը՝ փորձառություն՝ նոր հաջողության ձգտելու համար:

Արդ, լինեմք Հարության հանդեպ անշրջելի հավատքով զինված «նոր մարդ»՝ երկինք ուղղված վճիտ հայացքով, ապագայի հանդեպ վստահությամբ եւ խավարի դեմ մաքառելու վճռականությամբ»:

Իր քարոզի ավարտին Արշակ սրբազանը եւս մեկ անգամ աղոթք վերառաքեց հարություն առած Փրկչին՝ հայցելով, որ Նա մխիթարության բյուր շնորհներով սփռված բերի մեր ժողովրդի զավակներին, ամոքի վշտացյալների վերքերը, հուսալքվածներին՝ հույս, տկարներին՝ ամրություն, հիվանդներին՝ առողջություն շնորհի եւ առատաբաշխ Իր օրհնության մերքո խաղաղություն ու բարօրություն պարգեւի համայն աշխարհին, մեր երկրին ու մեր ժողովրդին:



Վեհարանում, ուր, հանդիսապետությամբ Ամենայն Հայոց Հայրապետի, կատարվեց Սուրբ Հարության տնօրինքը:

Սուրբ Հարության տոնի Պատարագը Երեւանի Ս. Գրիգոր Լուսավորիչ մայր եկեղեցում

Ապրիլի 4-ին Հայաստանյայց Առաքելական Ս. Եկեղեցին տոնախմբեց մեր Տեր եւ Փրկիչ Հիսուս Քրիստոսի իրաշափառ Սուրբ Հարության տոնը: Այս առիթով Ն. Ս. Օ. Տ. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսը սուրբ եւ անմահ Պատարագ մատուցեց Երեւանի Ս. Գրիգոր Լուսավորիչ մայր եկեղեցում:

Սրբազան արարողությանը Վեհափառ Հայրապետին



պէս, ինչպէս ճեղքել մշուշոտ խավարը: Գիշերը ցերեկ է դառնում, բայց մեր գիշերվա վախճանը, թվում է, չկա: Մոռացել է մեզ արդոյք Աստված, թողել բախտի քմահաճույքին, թե՛ ժամանակ չունենք մենք Աստծո համար: «Արդ,— ասում է Պողոս առաքյալը,— հեռացրե՛ք ձեզանցից հիմ մարդուն եւ նոր մարդ դարձե՛ք»: Փրկչի հարությանը հավատացող «նոր մարդուն» խորք են նյութապաշտությունն ու եսասիրությունը: Նա ժամանակը չափում է հավերժության



Հավարտ Պատարագի Ամենայն Հայոց Կաթողիկոսը բարձրացավ ս. Խորան եւ ս. Սեղանի կանթեղից վառեց Տեր Հիսուս Քրիստոսին խորհրդանշող կենսատու մոմը, որպեսզի հավատացյալները հնարավորություն ունենան իրենց հարկերից ներս տանելու հարուցյալ Աստվածորոտ կենարար լույսը:

Պատարագի սրբազան արարողությունից հետո Մայր Աթոռի միաբանությունը եւ ՀՀ նախագահը մեկտեղվեցին

որպես առընթերականեր սպասավորում էին Մայր Աթոռի լուսարարապետ Մուշեղ եպս Բաբայանը եւ Մայր Աթոռի եկեղեցական հայեցակարգային հարցերի գրասենյակի պատասխանատու Վազգեն եպս Միրզախանյանը:

Պատարագի ընթացքում Ամենայն Հայոց Կաթողիկոսը համայն հայությանը հղեց հայրապետական իր պատգամը՝ փոխանցելով «Քրիստոս յարեաւ ի մեռելոց» իրեշտակաբարբառ կենսամորոգ ավետիսը:

Մայր Աթոռ Սուրբ Էջմիածնի գահակալների ավանդը Մեծ եղեռնի նահապետների հիշատակի հավերժացման գործընթացում

Սկիզբը՝ թիվ 6

Նայ ազգը երկնածիր ու պայծառամիտ իր այս Կաթողիկոսին՝ Վազգեն Վեհափառին է պարտական նաեւ Հայոց ցեղասպանության փաստի բարձրաձայնման, միջազգային հնչեղության եւ ճանաչման գործընթացի սկզբնավորման համար: Այսպես, Եղեռնի 50-ամյակի առթիվ Վազգեն Առաջինը 1964 թ. սեպտեմբերի 24-ին նամակ հղեց Հռոմի Պողոս Զ Պապին, այնուհետեւ նույնաբովանդակ նամակներ ուղարկեց նաեւ Մոսկվայի եւ Համայն Ռուսաստանի Պատրիարք Ալեքսիին, Քենթրերիի Արքեպիսկոպոս եւ Համայն Անգլիայի Միտրոպոլիտ Մայքլ Ռեմգին, Եկեղեցիների համաշխարհային խորհրդի ընդհանուր քարտուղար, դոկտոր, պատվելի Վիսսեր դ'Յուֆտին: Հռոմի Պողոս Զ Պապին ուղարկված նամակում կարդում ենք. «Նորագույն պատմության մեջ առաջին ցեղասպանության մեծ ոճիրն էր, որ կատարվեց: Նահատակված հայ ժողովրդի միակ մեղքն էր, որ նա կամեցել էր այս աշխարհի վրա ապրել իբրեւ թրիստոնյա եւ ազատ ազգություն:

Մենք, իբրեւ Հայրապետ Հայ Եկեղեցու, Մեր խղճի պարտքը նկատեցինք հատուկ մի կոնդակ գրի առնել, 17 օգոստոս 1964 թվակիր, նվիրված Հայ Եկեղեցու եւ

հայ ժողովրդի այս մեծ ողբերգության հիսնամյա տարելիցին, 1965 թվականը հռչակելով սուգի եւ աղոթքի տարի:

Այսու Ձերդ Սրբության եւ համայն Կաթողիկե Ս. Եկեղեցու բարձր ուշադրությունը հրավիրում ենք սույն տարելիցի վրա, խորհելով, թե առաջնորդված քրիստոնեական գուրի եւ արդարության զգացումից, պիտի կամենայիք առաջիկա տարի ապրիլ 24-ի օրը Ձեր եւ Ձեր մեծ Եկեղեցու աղոթքը միացնել մեր աղոթքներին՝ երկու միլիոն նահատակ քրիստոնյա հայերի հոգիների խաղաղության համար»:

1965 թ. ապրիլի 24-ին, Մեծ եղեռնի հիսնամյա տարելիցի կապակցությամբ, աշխարհասփյուռ հայության բազմաթիվ ներկայացուցիչներ՝ հայ ազգին պատուհասած աղետի ակնմատեսներ ու նրանց զավակներ, մեծաթիվ ուխտավորներ ներկա եղան Մայր Աթոռում կազմակերպված հիշատակի արարողություններին: Հիշատակի արարողություններին իրենց մասնակցությունը բերեցին ՀՍՍՌ մինիստրների սովետին առընթեր Հայ Եկեղեցու գործերի խորհրդի նախագահ Կ. Դավաթյանը, խորհրդահայ մշակույթի երեւելի ներկայացուցիչներ Մ. Սարյանը, Պ. Սեւակը, Կ. Մելիք-Օհանջանյանը, Ա. Առաքելյանը, Կ. Զարյանը, Լ. Խա-

չիկյանը, Ա. Ղարիբյանը, Ա. Աբրահամյանը, Բ. Առաքելյանը, Կ. Ղաֆադարյանը, Վ. Հարությունյանը, Ռ. Իսրայելյանը, Ալ. Հարությունյանը, Գ. Եմինը եւ ուրիշներ: Ամենայն Հայոց Վազգեն Առաջին Կաթողիկոսը մատուցեց սուրբ եւ անմահ Պատարագ, կատարվեց հոգեհանգստյալ կարգ՝ նվիրված հայ ժողովրդի հավաքական մարտիրոսագրության հիսնամյակին, ապա Մայր տաճարի հյուսիսային կողմում տեղի ունեցավ Մեծ եղեռնի նահատակների հուշարձանի հիմնարկեցի արարողություն: Երեկոյան Վազգեն Առաջինը, իրեն ուղեկցող բարձրաստիճան հոգեւորականների թափուրով, իր ներկայությամբ պատվեց Երեւանի Ալ. Սպենդիարյանի անվան օպերայի եւ բալետի պետական ակադեմիական թատրոնում տեղի ունեցող հանդիսավոր միստը: Ապրիլի 25-ին Մայր տաճարում հանդիսավոր Պատարագ մատուցվեց, ապա գումարվեց հուշ-միստ՝ նվիրված Մեծ եղեռնի հիսնամյակին:

1965 թ. հոկտեմբերի 31-ին Վազգեն Առաջին Կաթողիկոսը, հոգեւոր դասի եւ հյուրերի ուղեկցությամբ, Մայր տաճարի հյուսիսային կողմում հանդիսավորապես բացեց Մեծ եղեռնի նահատակների հուշարձանը, որի հեղինակն է նշանավոր ճարտարապետ Ռաֆայել Իսրայելյանը: Հուշարձանի քա-

րե պատվանդանի վրա գրված է. «Խաչքար աղոթքի եւ ուխտի, ի հիշատակ 1915 թվի ապրիլյան եղեռնի հայ նահատակների»: Հուշարձանի երկրորդ երեսի վրա՝ աղեղնաձեւ քարե վահանի մեջ, փորագրված են հայ ժողովրդի արիությունը եւ ազատագրական պայքարի անշեղ ոգին արտահայտող հերոս բնակավայրերի անունները՝ Վան, Մուսա լեռ, Շապին Գարահիսար, Հաճն, Մարաշ, Եղեւիս, Չեթնոն, Սասուն եւ Սարդարապատ: Բացելով կոթողը՝ Վազգեն Առաջինը մասնավորապես ասաց. «Այս տարի՝ ապրիլի 24-ին, Մենք օրհնեցինք այս հողը, որպեսզի այստեղ մարմին առնե կոթող մը, նվիրված 1915 թվականի հայոց Մեծ եղեռնի զոհերու հիշատակին: Ահա այդ կոթողը, խորհրդանշի՞ր հայոց վշտին, խորանը մեր աղոթքին, վեմը մեր ուխտին: Դիտեցե՛ք զայն, խաչքարերու համախումբ հորինվածք մըն է ան, որ կապրի, կշարժի եւ դեպի երկինք կտանի վիշտը ամբողջ ժողովուրդի մը, որ մեզի հետ կբաժնե համայն մարդկությունը, որովհետեւ անոր ծոցին մեջ, հիսուն տարիներ առաջ, հնարավոր դարձավ պատմության մեծագույն ողբերգություններն մին, առաջին ցեղասպանությունը մեր դարում:

→ էջ 5, 7

Մուշեղ Գալշոյան

Սկիզբը՝ թիվ 3—6

Մ. Գալշոյանի հայրենակից Գեորգ Յակոբյանի պատմածն է, նաեւ գրածը. «Թուրքերն այրում են Սասունի Բրդոնք գյուղը: Փրկվում է միայն քեռի Մանուկի ընտանիքը: Այսպես փրկվելն ամոթ էր: Քեռի Մանուկն իր կնոջն ու վեց երեխաներին ուղարկում է փախուստի մատնված հայրենակիցներին ձորերից ու կիրճերից փրկելու: Փրկվածներին ապահով տեղ հասցնելու համար զոհվում են նրա հինգ տղաներն ու կինը, իսկ աղջիկն արնաքամ ընկնում է այս լուրջ հորը հայտնելու պահին: Քեռի Մանուկը գաղթում է Արեւելյան Չայաստան, ամուսնանում, բայց այլեւս երեխաներ չի ունենում: Երեխաների աճյունները մնացին հայրենիքի ձորերում: Օր ծերության Քեռի Մանուկը մի դույլ անարատ ձյուն ձեռքին կանգնում է կոլտնտեսության մախազահի դռանը եւ ասում. «Նախագահ, մեքենա տուր, էս ծաղիկները,— ցույց է տալիս դույլի միջի ձյունը,— տանեմ երեխեքին, էնտեղ, ուր նրանց ոսկորներն են»:

Այս սյուժեն «Մարութա սարի ամպերը» ժողովածուի մեջ կարող էր լինել: Այդպես է գրողի ստեղծած ձգողականության դաշտի օրենքը:

Գալշոյանի ժամանակակիցները նաեւ տազնապներ ունեին, թե ինչ է լինելու նրա հաջորդ քայլը: Բայց ամեն անգամ նրա հաջորդ քայլը կայանում էր՝ շվարունի մատնելով նրան ստեղծագործական կես ճա-

նապարհին թողնելու պատրաստ կասկածամիտներին:

Գալշոյանն այն երջանիկ գրողներից էր, որոնց թիկունքին ժողովուրդ ու բնաշխարհ կար՝ իրական մարդիկ, իրական կենսագրություններ, բերնից բերան անցնող պատմություններ: Այս նկատառումով իր հերթին վարձատրված է այն ժողովուրդը, որն իր ծայրը տեղ հասցնող գրող ունի: Նաեւ սրանով է պայմանավորված կարճ ժամանակում Գալշոյանի ձեռք բերած ժողովրդականությունը, ընդ որում՝ ոչ միայն հայրենիքում, այլեւ արտերկրի հայության մեջ:

Այսուհանդերձ, Մ. Գալշոյանի գեղարվեստական համակարգը ոչ թե ներփակ աշխարհ էր՝ միայն ազգային գրականության որոշակի ավանդույթներով, այլ ընդհանրության եզրեր ուներ դարձյալ բնաշխարհիկ ուղղվածություն ունեցող ժամանակակից արձակի հետ: Նկատի ունեցնուսական արձակի այնպիսի ներկայացուցիչների, ինչպիսիք են Վ. Շուկշինը, Վ. Ռասպուտնին, Վ. Բելովը եւ ուրիշներ: Տարբեր են նյութը, միջավայրը, հար-



ցադրումը, բայց երբեմն բացահայտորեն նույնն են հանրային ու կենցաղային մտահոգությունները, հողի ու մարդու հարաբերության բարոյականության դրսևորումները: Ասածը փաստելու համար զուգահեռ գծերի վրա կարելի էր մտաբերել Գալշոյանի պատմվածքների եւ հայ գրողի տարեկից Վ. Բելովի ստեղծագործությունների որոշ պատկերներ: Որպես կարճ տեղեկանք՝ ասենք, որ Բելովի ցավը սեւահողային Ռուսաստանի, Վոլոգդայի երկրամասի ճակատագիրն էր:

Գալշոյանի «Աղորիք» պատմվածքի հերոս Խալեն առատ բերքը հավաքելու պա-

հին, միաժամանակ այն կորցնելու ահը սրտում, մտածում է մի կերպ ընտանիքի ապրուստը հոգալու, ծայրը ծայրին հասցնելու մասին. «Չարսնուկ բոբիկ... հարսնուկ բոբիկ ու չիփլախ:— Եթե ոչ մեկին ոչ մի մագ չգնի, հարսին, ճիտքը ծուռ մնացած հարսին, Խալեն ոտից գլուխ հագցնելու է:— Ազնոն չիփլախ, Նախշուն բոբիկ ու չիփլախ:— <...> Ազնոն հասած աղջիկ է. Ազնոյին մամապես պետք է կարգին հագցնել, ինչ հարսի համար գնեց՝ նույնը աղջկան:— Մուրդիկ բոբիկ, Քնոն բոբիկ ու չիփլախ,— դպրոց են գնում, ամոթ է,— Նխշուն բոբիկ, Սմբոն բոբիկ, Աբեթնակ... Չէ, Աբեթնակ դեռ մատմիս երեխա է, դպրոց էլ չի գնում: Պստիկ թռռների համար Խալեն սոլ չի առնի, տրեխ կկարի...»:

Նույն հոգսից ծնված ցավն է նաեւ Վ. Բելովի «Էս է...» վիպակում. «Կատերինան գողումի, որ կթորուհիները չտեսնեն, սրբեց արցունքը: Գոնե մամակով մի հնգամոց կուղարկեմ Տանյուշկային: <...> Անտոշկային էլ շաբաթական մի երեքնոց պիտի հանես ու տաս, չնայած կերակրում են գիշերօթիկում, բայց պիտի տաս: Վալենկաներն էլ է լրիվ մաշել, ախր ծակ ոտնամա՛նով դպրոց ուղարկել չի լինի, նոր վալենկա է պետք նրան, Գրիշկային ու Վասկային էլ մի-մի շապիկ, վաղուց են խոստացել, պիտի առնեն, <...> Մարուսյային էլ ռետինե սապոգ է պետք...»:

→ էջ 7

Կրակի խորհրդապատկերը Մուշեղ Իշխանի «Կրակը» ժողովածուում



Սկիզբը՝ թիվ 4—6

Իշխանի երկերի կենտրոնում մասնավորապես հայ մայրերն են՝ իրենց բարձր նկարագրով: «Դու՛ք, մամիկներ սեւագգեստ» բանաստեղծությունը հայ մայրերի հետ զրույց է, որն իր մեջ ներառում է գաղթափախության դառը ճակատագիրը, ներկա «բարութանդ դարբերը», միեւնույն ժամանակ՝ լուսավոր ապագան:

Դուք հարենիքն եք շարժում, մեկ-մեկ գավառ կենդանի. Ներկայի «Սուտ երագեն» աչքերնդ փակ երբ կ'անցնիք՝ Դուք կ'ապրիք լոկ ամեն ժամ մշտաբան կյանքն անցյալի Սեր սարերում, մեր ջուրին եւ մեր լուսնին բացառիկ: (էջ 78)

Ստացվում է, որ պատմական հայրենիքը կերպավորվում է արտացոլանքի գոր-

ծառույթ ունեցող աչքեր, ջուր եւ լուսին նշանների միջոցով, որոնց ընտրությունը, կարծում ենք, պատահական չէ:

Պարզ է, որ հայ մայրերի տառապանքներն Իշխանը զուգակցում է ողջ հայ ժողովրդի չարչարանքների հետ: Մայրերը դիտվում են ոչ միայն իբրեւ զոհեր, այլեւ «անողորմ պահակները» ազգային հնավանդ արժեքների, որի արտահայտությունը «տոհմային լույս» նշանն է: Իսկ հայ մայրերի՝ Չայ Առաքելական եկեղեցու նկատմամբ ունեցած անսահման սիրտ ու նվիրումի նկարագրությամբ՝ գրողը մատնանշում է ազգի փրկության ուղին: Եվ բանաստեղծության սկզբում կիրառվող «որոտացող փոթորիկ — մահաշունչ անապատ» նշանների իմաստը բանաստեղծությունն ամփոփող տողերում հակադրվում է եկեղեցուն վառվող մոմերի եւ երկնքում փայլող աստղերի լույսին: Այս եւ մի քանի բանաստեղծություններում Մ. Իշխանը երեւում է իբրեւ մեծ հավատացյալ եւ քրիստոնեական դավանաբանությանը հավատքով մոտեցող արվեստագետ:

Գրողի անտարակույս հավատի, հայ ժողովրդի անմահության եւ հավերժական գոյության երաշխիք է հայ մամիկների օրինանքի խոսքը, որը թեպետ իր անմիջական արտահայտությունը չի գտնում բանաստեղծության մեջ.

Բարի, բարի հայ մայրեր, ահա կ'իյնանք ձեր առջեւ, Օրհնեցեք մեզ սրտագին ձեր իսկ ձեռքով թառամող, Որ չմարի կես ճամբուն աստղ ու հավատք մեր վերեւ Եվ ձեզի տանք, ձեր մահվան, հայ աշխարհեն ափ մը հող... (էջ 78)

Եվ եթե հեղինակը ժողովրդի հավերժա-

կան գոյության գաղափարն իրագործված է տեսնում հայ մայրերի օրինանքի մոգական խոսքում, ապա «Անունի մը համար» երկում քնարական հերոսը կրկին զգում է մոգական խոսքի կարիքը, բայց այս անգամ անձնական-անհատական ցավերը բուժելու նպատակով, «...Իբրեւ Չաղթերգ Ունայնության դեմ նետված» («Անունի մը համար», էջ 59): Հեղինակն աշխատում է ցույց տալ տարագիր մարդու ներաշխարհի վրա թողած մայրենիի հրաշագործ ազդեցությունն ու արձագանքը՝ հայահունչ կրակ-խոսքի մեջ տեսնելով ապրելու, գոյատևելու միակ հնարավորությունը եւ կյանքի զարգացումը (Սփյուռքի այս նույն զգացողությամբ տարագիր այլ հեղինակներ եւս, ինչպես Վ. Թեքեյանը եւ Վ. Շուշանյանը, իրենց խռովահույզ «ներքին դաշտանկարի» (Վ. Շուշանյան) մասին գրում են գրեթե նույնը: «Կը բավեր, որ ընկեր մը հայրենական երգ մը երգեր, որպեսզի հոգիս կորսնցներ իր հավասարակշռությունը: Ու ահա տարագիր հայրենիքը կը վերադառնար աքսորական արքայի մը պես ու կը վերահաստատեր իր թագավորություն»,— գրում է Վ. Շուշանյանը (Վազգեն Շուշանյան, Ներքին դաշտանկար, Երեւան, 1995, էջ 19): Բանաստեղծական հետեւյալ պատկերը «կենդանի պարտուած» մեկ այլ մտավորականի՝ Վ. Թեքեյանի հոգու պատկերն է. «Բառ մը յաճախ բառ է հորիզոններ բանալու, // ճառագայթ մը անցնալէս, կըլլայ լույսը ներկային»):

Գրականագետ Վ. Գաբրիելյանը, խոսելով Մ. Իշխանի «Կրակը» ժողովածուի առանձնահատկությունների մասին, բացահայտում է կրակի խորհրդանշական տարբեր իմաստները՝ կրակը որպես տան, օջախի պահպանման խորհրդանիշ, որպես ջերմացուցիչ օտար սառնության մեջ, որպես բորբոքիչ անորոշ հուսալքության պահերին, կորցրածը վերագտնելու ճանապարհը լուսավորող ջահ, սիրտ եւ կյանքի, հույսի, հավատի ու մաքառման (Վազգեն Գաբրիելյան, Չայաստանի տարագիր բանաստեղծը, Դիտարկումներ գրականության ճանապարհին, Երեւան, 2018, էջ 127): Մեր

կարծիքով՝ գրականագետի մատնանշած կրակի բոլոր իմաստներն ակնարկվում են ժողովածուին բացող «Անունի մը համար» երկում, որը մի տեսակ մուտք է դառնում ժողովածուի բանաստեղծական աշխարհը ներթափանցելու: Արդեն իսկ առաջին բանաստեղծության մեջ առկա պատկերները՝ շեն տան հետ կամենալովող «հայահունչ մեկ բառ» — «արյունիս մեղեդի» — «լույսի մատյան» — «արյունող վշտերուն շոյանք եւ օրոր» — «տենդեն այրած ջիղերուն նոր ավիշ» — «արյունոտ խենթությամբ պայքար» համեմատություններով, արտահայտում են կրակի գլխադիր գաղափարները եւ խորհրդանշական իմաստները, որոնք մասնավոր դրսևորումով կամ նշանաշարերով ի հայտ են գալիս ժողովածուի առանձին բանաստեղծություններում եւ դառնում ժողովածուի էությունը:

Հաշվի առնելով Իշխանի ստեղծագործության մեջ խոսքի մոգության դրսևորումները՝ կարելի է ասել, որ նրա բանաստեղծությունները պահպանում են առասպելական մտածողության կնիքը: Դրանք հիշեցնում են կրոնադիցաբանական պատկերացումներում հաստատված խոսքի՝ իրերի վրա իշխանություն ձեռք բերելու գաղափարը: Առասպելական կառույցի նվազագույն միավորը (միֆեմ) խոսքն է, որը հանդիպում է ինչպես Աստվածաշնչում («Աստված ասաց, թող լինի լույս, եւ եղավ լույս»), այնպես էլ հունական դիցաբանության կրակի աստծո՝ Հեփեստոսի (հռոմեական դիցաբանության մեջ՝ Վուլկան) մասին պատմող առասպելում. «Ձարմանահրաշ փութսեր են դրանք. գործի են ընկնում առանց ձեռքերի օգնության. Հեփեստոսի խոսքին են ենթարկվում: Մի խոսք կասի նա, եւ գործի կանցնեն փութսերը՝ վառ բորբոքելով հնոցի կրակը» (Ն.Ա. Կուն, Հեփեստոս, Հին Հունաստանի լեգենդներն ու առասպելները, էջ 77):

Շարունակելի

Մարինե ՂԱԶԱՐՅԱՆ
ԵՊՀ հայ նորագույն գրականության
ամբիոնի դասախոս

ՌԱՓԱՅԷԼ ՊԱՅԿԱՆՑԱՆ (1830–1892)



Սկիզբը՝ 2020-ի թիվ 18–24, 2021-ի թիվ 1–6

ՊԱՏԿԱՆՅԱՆԻ ԱՐՁԱԿ

Փորտուղին Ավագը թեև օժտված է բնավորության անհատական գծերով, բայց եզակի չէ եւ հասարակ անվան վերածված հավաքական կերպար է։ Անպիտան մարդու այն տեսակն է նա, որ սողոսկում է իրականության բոլոր ոլորտները, ձգտում է կորզել կյանքից ինչ կարող է՝ առանց հանրությանը որեւէ օգուտ տալու։ Նա եւ նմաններն են խոչընդոտում կյանքի առաջընթացը, չորացնում, փչացնում, ապականում ամեն ինչ։

Պատմվածքի վերջում Նոր Նախիջեանի՝ Ռոստոմից հետամնացության հեղինակային հիմնավորումը՝ որպես գեղարվեստա-

կան ընդհանրացում, այսօր էլ ունի արդիական հնչեղություն. «Դու ինչո՞ւ ես զարմանում, որ Նախիջեանը աճելու, ծաղկելու փոխարեն՝ քանի գնում՝ բորբոսում, թառամում է, փչանում քո ձեռքի մեջ։ Ասա մեկ տեսնեն, տարին տասներկու ամիս դու որի՞ խելքով ես կառավարվում — Փոռսուխ Ավագների։ Ովքեր են քո քաղաքը կառավարողները — Փոռսուխ Ավագները. ովքեր են քո քաղաքի վարչությանը ձայնավորները — Փոռսուխ Ավագները. ովքեր են քո դպրոցներիդ հոգաբարձուները — Փոռսուխ Ավագներ։

Հետո, ի՞նչ զարմանալու բան կա, որ ամբողջ քաղաքը դարձել է մի 5–6 հազար Փոռսուխ Ավագներով լցված աղբանոց...» (նույն տեղում, էջ 555)։

ՎԻՊԱԿԱՆ ԱՇԽԱՐՀ

Պատկանյան վիպասանն առանձնապես չի մտահոգվել իր վեպերի «ճարտարապետական հյուսվածքի» կատարելությամբ եւ իր թելադրանքով գործող գաղափարակիր հերոսների արարքների գեղարվեստական համոզությամբ. գեղագիտական բարձր իդեալի դիրքերից նա, փաստորեն, ստեղծել է վիպական գործողություններում միայնակ հարաբերվող հերոսների եւ «հակահերոսների» (այս մասին համաձայնորեն տես Մակարյան Ա., Սողոյան Ա., Ռաֆայել Պատկանյանի վիպաշխարհը, «Վեն» համահայկական հանդես, 2016, թիվ 3 (55), էջ 85–118) տիպեր, որոնք գործում են միեւնույն երկում, իսկ դրանց նմանակները՝ մյուս ստեղծագործություններում։ Այսպես, Պատկանյանի կերպավորած իդեալական հայի կերպարներ են Միքայել Վայելչյանը՝ «Ես նշանած էի», Սուսաննան կամ Շուշանը՝ «Փառասեր», Վարդան Հուսիկյանը կամ Հուսկանյանը եւ Եկատերինան կամ Կատյան՝ «Տիկին եւ նաժիշտ» վեպերում, իսկ բացահայտ «հակահերոս» կարող են համարվել Հարություն Ալեմազովն ու իր հայրը՝

նույն «Փառասեր», իսկ Սոֆյան ու իր հայրը՝ հաշտարախանցի մոսկվաբնակ, ինքնաբավ մեծահարուստ, հայառյաց Ասատուր աղան՝ «Տիկին եւ նաժիշտ» վեպերում (այս երկերի վեպ թե վիպակ լինելու տեսական բանավեճին անդրադառնալու փոխարեն՝ նախընտրում ենք դրանք դիտարկել հեղինակային բնորոշմամբ)։

Հեղինակն իր արձակ էջերում նույնպես ընթերցողի առջեւ բարձրացրել է ժամանակի՝ իրեն մտահոգող լուսավորական, մարդկային-բարոյական ու սոցիալ-տնտեսական եւ հայ մարդու բարոյական նկարագրի եւ ազգային ճակատագրի հարցերը։

«Ես նշանած էի» երկն առաջինն է Պատկանյանի վեպերի շարքում։ Դեպքերը կատարվում են 1850-ական թթ. Պետերբուրգում, որտեղ ուսանող էր գործող հերոս Միքայել Վայելչյանը։ Ի դեպ, վեպը 1880 թ. «Փորձ» ամսագրում տպագրվել է հենց այս ստորագրությամբ, որը հեղինակի ծածկանուններից մեկն է։ Վերնագրին հաջորդող «Ճշգրիտ անցք իմ հիշատակարանից» գրառումը հավաստումն է դեպքերի, ինչպես եւ պատումը վարող հերոսի կերպարում առկա ինքնակենսագրական տարրերի վավերականության։

Իրական-վավերական են ուրվագծվող պետերբուրգյան չարաշուք ծնեմվա, սովի ու համաճարակների, հաճախադեպ մահերի ու հարյուրավոր թաղումների եւ տարբեր հաստատություններում սովորող աղքատ ու քաղցած հայ ուսանողների դժվարին կյանքի պատկերները։ Ահա ինքնակերպավորվող Միքայելը, որն սկզբից եւեթ առանձնանում է որպես առանցքային դերակատար, հյուսում է վիպական հանգույցն ու հայտնվում գործողությունների կենտրոնում, հաշտարախանցի (աստրախանցի) Տեսնատա մականունով Ալեքսանը՝ «գործնական» վարքագծով, նկարելու թուղթ ու մատիտ չունենալու դժգոհությունից ու ծանձրությանց ցուրտ սենյակում ձեռքերը գլխատակին պառկած, առաստաղից թքով «տառաքան» վար բերել փորձող գեղարվեստի ուսումնարանի սան Հովհաննեսը...

Միքայել Մարիին հանդիպում է պատահաբար՝ «ներքին ձայնի» թելադրանքով, սիրահարվում է ու կամավոր ենթարկվում դիպվածների փորձությանը։ Մեծ Քարե կամրջի վրա ամենից աղքատիկ թաղման թափոն էր տեսել Միքայելը՝ անշուք մի դիակառք՝ վրան Մարիի նորոգ հանգուցյալ մոր դագաղը, երկու ուղեկից ռուս պառավ ու եվրոպական արտաքինով միայնակ սգավոր մի գեղեցկուհի, որ անել վշտի մեջ ուներ օգնության ու մխիթարության կարիք։ Առաջադրվում է երկի գաղափարական հիմնահարցը՝ նման ծայրահեղ իրավիճակում ինչպե՞ս իրեն պիտի դրսևորեր իդեալական հայը։

Անծանոթ սգավոր գեղեցկուհուն Միքայելը վերաբերվում է հարազատի պես ու ինքնաբերաբար դառնում ցավակից հուղարկավոր։ Լյուբերականների գերեզմանոցի ճանապարհը ճշտելուց հետո՝ դիասայլը կտրուկ շրջելու պահին, սահելով ընկնող դագաղը կանգնեցնելիս վիրավորվում է նրա ձեռքը։ Մարին վերքը կապում է իր թաշկինակով, որի եզրին ասեղնագործված էին Մ. Վ. լատինական տառերը, որոնք, Միքայելի եւ Մարիի անուն-ազգանունների սկզբնատառերին համընկնելուց բացի, ունեին «մահ թույնից» նշանակությունը։ Ուրեմն՝ չարաբաստիկ կանխատեսումը վիպական գործողությունների ավարտին պիտի իրականանար։

Հնավաճառից գնած գրասեղանի գգրոցում հսկայական հարստություն գտած Միքայելն օրինապահ քաղաքացի էր. ոչինչ չէր խանգարում, որ նա իր գնած սեղանի փակ դարակից հայտնաբերած գանձը միանձնյա տնօրիներ սեփականության իրավունքով, բայց նա ազնիվ մղումներով գերադասում է հարստությունը հանձնել քաղաքապետարանին եւ օրինականորեն ստանալ նրա քառորդ մասը միայն։

Այդ առաքինի երիտասարդն այդքանով էլ էր հարուստ, համուն Մարիի նա զոհաբերել էր շատ բան ու նվաճել նրա սերը։ Աղջիկն ինքն էր շտապեցնում իրենց ամուսնությունը։ ➔ էջ 8

Մայր Աթոռ Սուրբ Էջմիածնի գահակալների ավանդը Մեծ եղեռնի նահապետների հիշատակի հավերժացման գործընթացում

➔ էջ 3

Այս խաչքարը դեպի երկինք կտանի նաեւ մեր աղոթքը մոտ երկու միլիոն մեր նահատակ զավակներուն հոգիներուն խաղաղության եւ լուսավորման համար։ Անոնք գերեզման իսկ չունեցան այս աշխարհի վրա, սակայն մեր սրտերը կվկայեն, թե «նոցա է արքայութիւն երկնից»...

Այս օրեն սկսյալ սրբավայր մըն է այստեղ, նվիրված մեր ողբերգական անցյալին, մեր զոհված եղբայրներուն եւ քույրերուն հիշատակին, մեր ժողովուրդի ինքնապաշտպանության հերոսամարտերուն, մեր ազգային ուխտին»։

Այս իրադարձությունն ուշագրավ է նաեւ այն առումով, որ Նահատակաց հուշարձանի բացման արարողությունը զուգահիշեց Վազգեն վեհափառի գահակալության տասնամյա հոբելյանին, ուստի ներկա էին նաեւ այդ առիթով Հայաստան ժամանած քույր եկեղեցիների գահակալները։ Հավելենք, որ մինչ այդ պահը Մեծ եղեռնի նահատակների հիշատակին նվիրված միակ հուշարձանը՝ մատուռի տեսքով, 1950-ական թվականներին կառուցվել էր Անթիլիասում՝ Մեծի Տանն Կիլիկիո կաթողիկոսարանի տարածքում, ուր ամփոփվել էին Դեր Ձորից բերված զոհերի աճյուններ։

Փաստորեն, 1964 թ. օգոստոսի 17-ին Ամենայն Հայոց Կաթողիկոս Վազգեն Առաջինի հրապարակած սրբատառ կոնդակը, որով առաջիկա 1965 թ. հռչակվում էր Հայոց եկեղեցու եւ համայն հայ ժողովրդի համար ազգային սգի եւ աղոթքի տարի, նախորդեց Հայոց պատմության շրջա-

դարձային կարեւոր իրադարձությանը. 1965 թվականից Խորհրդային Հայաստանում սկիզբ դրվեց Հայոց ցեղասպանության զոհերի հիշատակը ապրիլի 24-ին պաշտոնապես նշելու ավանդույթին, եւ հայ ազգի մեծագույն ողբերգությունը վերջապես դադարեց արգելված թեմա լինելուց։ Այդ գործում անգնահատելի է Հայաստանի կոմունիստական կուսակցության կենտրոնական կոմիտեի առաջին քարտուղար



Յակով Նիկիտայի Չարոբյանի ներդրումը. հայրենասեր մեծ գործիչը վճռական քայլեր ձեռնարկեց հայ ժողովրդին պատուհասած ողբերգության զոհերի հիշատակին նվիրված միջոցառումները պատշաճ կազմակերպելու եւ անցկացնելու համար։ 1965 թ. փետրվարին Հայկական ՍՄՀ կառավարությունը պատրաստեց ցեղասպանության

զոհերի հիշատակին նվիրված հուշահամալիրի կառուցման որոշման նախագիծը, իսկ Հայաստանի կոմկուսի կենտկոմը շուտով հաստատեց այն։ Հուշարձանի բացման պաշտոնական արարողությունը ծրագրված էր 1967 թ. ապրիլի 24-ին, սակայն տեղափոխվեց Հայաստանի խորհրդայնացման օրը՝ նոյեմբերի 29-ին։ Եվ ահա 1967 թ. նոյեմբերի 29-ին Ծիծեռնակաբերդի բարձունքում հանդիսավոր արարողությամբ բաց-

կարեն Դեմիրճյանի զխավորությամբ։ Այդ օրն առաջին անգամ հայտարարվեց լուծության ռուպե։ Կ. Դեմիրճյանն իր հեռուստաեկութուն դատապարտեց Օսմանյան Թուրքիայի իրականացրած զազրելի ոճրագործությունը՝ տալով քաղաքական գնահատական եւ այն որակելով որպես 20-րդ դարի առաջին ցեղասպանություն, մտցվեց ապրիլքսանդրյան «Լեռնայն ռուպեն»։

Նորանկախ Հայաստանի Հանրապետության առաջին նախագահ Լեւոն Տեր-Պետրոսյանի ղեկավարման տարիներին Ծիծեռնակաբերդի բարձունքում կառուցվեց թանգարան, որը հետագայում անվանվեց Հայոց ցեղասպանության թանգարան-ինստիտուտ։ Թանգարանը բացվեց 1995 թ. ապրիլի 24-ին՝ Մեծ եղեռնի 80-րդ տարելիցի օրը։

Մայր Աթոռ Սուրբ Էջմիածնի՝ Մեծ եղեռնի նահատակների հիշատակի հավերժացման մտայնությամբ ձեռնարկված միջոցառումներն իրենց լրմանը հասան եւ պսակվեցին Հայոց ցեղասպանության նահատակների սրբադասման արարողությամբ։ 2015 թ., Մեծ եղեռնի 100-րդ տարելիցի առթիվ, ապրիլի 23-ի երեկոյան Մայր Աթոռ Ս. Էջմիածնի Ս. Տրդատի բաց խորանում, 400 տարվա ընդմիջումից հետո, Ն. Ս. Օ. Տ. Տ. Գարեգին Բ Շայրագույն Պատրիարք եւ Ամենայն Հայոց Կաթողիկոսի եւ Ն. Ս. Օ. Տ. Տ. Արամ Ա Մեծի Տանն Կիլիկիո Կաթողիկոսի հանդիսապետությամբ կատարվեց սրբադասման կարգ. Հայոց եկեղեցու սրբերի շարքին դասվեցին Հայոց ցեղասպանության ամենը զոհերը։ ➔ էջ 7

Նրանք մնում են որպես դավաճանության խարանք կրողներ



(Ծննդ. Դ 10): Այս հատվածում մեկ անգամ եւս ընդգծվում է այն ճշմարտությունը, որ աշխարհում որեւէ բան գաղտնի չի մնում, վաղ թե ուշ ամենայն ինչ բացահայտվում է, նույնիսկ երկիրն ու երկինքն են աղաղակում գործված մեղքի մասին (հմմտ. Ծննդ. Դ 10)... Իսկ ի՞նչ կապ ունենա այս դրվագը դավաճանության հետ... Կայենի արարքը լոկ սպանություն չէր. աղամորդին մասի դավաճանեց ինքն իրեն, ապա՝ իր արյունակից եղբորը՝ հակադրվելով մարդուն գիշատիչ կենդանուց տարբերակող աստվածաշնորհի պատկերին. ինչպես իրավամբ նկատում է Պլատոնը, «դավաճաններն առաջին հերթին դավաճանում են իրենք իրենց»:

Արարչության պատմության եւ հասարակության վերաբերյալ կան փիլիսոփայական, քաղաքագիտական, հասարակագիտական տարբեր տեսություններ, որոնք տվյալ ոլորտին բնորոշ ուղղվածությամբ են փորձում բացահայտել պատմական զարգացման բնույթը, բացատրել գործընթացներն ու օրինաչափությունները, տարբեր իրադարձությունների ու երեւոյթների պատճառահետեւանքային կապերը եւ այլն: Այս համակարգում իր ուրույն դերակատարումն ու տեղը (լինի դրական թե բացասական) ունի անհատը: Մարդն իր իսկ փոքրիկ «պատմությունն» է, իր կերտած կենսագրությունը, իր անցած ուղին, թողած հիշատակը: Եվ այս առումով, կարծում ենք, ամենադժբախտը (բառի բուն իմաստով) նա է, ում անունը պատմության էջերում «սեւ» տառերով է դրոշմված, ում նույնացնում են չարիքի եւ դավաճանության հետ, ում անունը անեծքով շաղախված են արտաբերում... Իսկ այդպիսիք, ցավոք, քիչ չեն մարդկության պատմության մեջ... Երբ ասում ենք «դավաճան», ակամայից մտաբերում ենք Յուդային, նրա կեղծ համբույրն ու մատնությունը, 30 արծաթը... Այս մասին դեռ կխոսենք, իսկ մինչ այդ անդրադառնանք սուրբգրային մեկ այլ դրվագի՝ առաջին սպանությանը:

Աստվածաշունչ մատյանը վկայում է, որ բերկրության դրախտից արտաքսվելուց հետո Ադամն ու Եվան զավակներ են ունենում: Նրանցից Աբելը հովիվ է դառնում, իսկ Կայենը՝ հողագործ: Որոշ ժամանակ անց եղբայրներն ընծաներ են բերում Աստծուն՝ Կայենը երկրի բարիքներից, իսկ Աբելը՝ ոչ-խարմերի առաջնեկներից (հմմտ. Ծննդ. Դ 1–4): Աստված ընդունում է Աբելի ընծաները, իսկ Կայենին ու նրա նվերներին ուշադրություն չի դարձնում, քանզի վերջինս բարությանը ու սիրով չէր զոհաբերում: Երկնային Հայրը տեսնում է այն, ինչ չի կարող տեսնել արարված մարդը. Նա ըմբռնում է սրտերն ու հոգիները, Նրա ամենագործ կամքից որեւէ բան ծածուկ չի մնում: Կայենը շատ է տրտմում, նրա դեմքը մռայլվում է: Աստված Կայենին ասում է. «Ինչո՞ւ տրտմեցիր, ինչո՞ւ մռայլվեց դեմքը: 2Է որ եթե արդար ես զոհաբերում, բայց արդար չես բաժանում, մեղանշած ես լինում: Հանգիստ եղիր, դու կարող ես մեղքից ազատվել, դու ի վիճակի ես այն հաղթահարելու» (Ծննդ. Դ 6–7): Այսինքն՝ Աստված կարողացել էր Կայենի մտքերը եւ գիտեր նրա մտադրությունը: Եվ ահա, երբ եղբայրները դաշտ են հասնում, Կայենը՝ չար նախանձից դրված, հարձակվում է Աբելի վրա եւ նենգաբար սպանում նրան: Աստծու հարցին՝ «Ո՞ր է քո եղբայր Աբելը», Կայենն անամոթաբար չքմեղանում է. «Չգիտեմ, միթե ես իմ եղբոր պահակն եմ» (Ծննդ. Դ 9): Եղբայրասպանին թվում էր, թե որեւէ մեկը ականատես չի եղել իր սարսափելի հանցանքին, եւ ինքը կարող է թաքցնել իր գործած անմեղելի չարիքը: Սակայն, ինչպես արդեն մշտել ենք, Աստծու ամենատես աչքից որեւէ բան ծածուկ չի մնում. «Այդ ի՞նչ արեցիր, քո եղբոր արյան կանչը երկրից բողոքում է ինձ»

րեց ըստ Իր պատկերի եւ մեծության (հմմտ. Ծննդ. Ա 26–27). Ս. Գրիգոր Տաթևացին գրում է. «...գի մարդն երրորդութեանն է պատկեր եղեալ որպէս ցուցաւ...» («Գիրք հարցմանց երիցս երանեալ սրբոյն իօրն մերոյ Գրիգորի Տաթևացոյն», աշխ.՝ Ս. Արեւշատեանի, Երուսաղէմ, 1993, էջ 272–273): Ի սկզբանե «մարդն արարւում է Աստուծոյ պատկերով եւ մեծութեամբ՝ միեղէն ներդաշնակութեան մէջ իր Արարչի հետ, նա մեծարուած է գերագոյն փառքով՝ նուիրական միութեամբ աստուածային իրականութեան հետ՝ որպէս արարչութեան պսակ: Մարդու ստեղծումը միեղէն արարչական գործողութիւն է, որով արարուածը ոչ թէ օտարում, այլ դրում է նախախնամական եւ շնորհական միութեան մէջ իր Սկզբնապատճառի հետ» (Մեսրոպ քնյ. Արամեան, Միեղինութեան սկզբունքը աստուածաբանութեան մէջ, «Գանձասար» աստուածաբանական հանդէս, Երեւան, 1994, է, էջ 85): Այսինքն՝ եղբայրասպանության ծանրագույն մեղքով Կայենը խեղում է իր աստվածամանությունը, ապականում Աստծու պատկերը, հետեւաբար՝ կորցնում է ամենաբանկն ու կարելորդ՝ Արարչի շնորհը, զրկվում Նրա հետ միությունից ու հաղորդակցությունից: Գիտենք նաեւ՝ Արարիչը մարդուն օծել է բանականությամբ եւ ազատ կամքով, որոնցով վերջինս պետք է իշխեր ողջ աշխարհին: Նույն ազատ կամքով մարդը կամ մաքրագործման ու վերելքի, կամ մեղանշումի եւ անկման ուղին է ընտրում: Ամենատես Հայրը Կայենին զգուշացնում է, որ ազատի ի եղկելի մտքերից, հաղթի մեղքին, քանզի հակառակ դեպքում նրա սրտում արթնացած չարությունն ու նախանձը հանգեցնելու են անմեղելի արարքի: Չնայած Աստծու հորդորին՝ «Հանգիստ եղիր, դու կարող ես մեղքից ազատվել, դու ի վիճակի ես այն հաղթահարելու» (Ծննդ. Դ 7), Կայենը չար նախանձի պատճառով իեղում է սեփական եղբոր արյունը՝ դառնալով ոճրագործ: Ըստ էության մենք ստորությունները կատարվում են նախանձից եւ ատելությունից դրոշմված, իսկ փոքրերը՝ վախից:

Եվ ահա, իր մեծանին կյանքից զրկողն արժանանում է Աստծու նզովքին. «Արդ, անհիշյալ լինես երկրի վրա, որը բացեց իր բերանը եղբորդ՝ քո ձեռքով թափած արյունն ընդունելու համար: Դու պիտի մշակես հողը, բայց նա պիտի չկարողանա բեզ տալ իր արդյունքը» (Ծննդ. Դ 11–12): Հողը՝ ներկված անմեղ զոհի արյամբ, վերածվում է պատժի գործիքի՝ Կայենին զրկելով իր բնական բարիքներից: Ապա՝ «Ահ ու դողի եւ երեւման մեջ պիտի լինես երկրի վրա» (Ծննդ. Դ 12): Առաջին հայացքից թվում է, թե Աստված խիստ մեղմ պատիժ է սահմանում եղբայրասպանի համար... արդյո՞ք ողջ կյանքում ահ ու դողով ապրելը, մշտապես սարսափի մեջ գտնվելը, սեփական բնօրրանում արտաքսված եւ մերժված լինելը, մարդասպանի խարամը ճակատին կրելը, ազգակիցների կողմից ատելի եւ արհամարիված լինելը մեղմ պատիժ է. դատե՞ք ինքներդ... Եվ Աստված նշան դրեց Կայենի

վրա, որպէսզի որեւէ մեկը չսպանի նրան (տե՛ս Ս. Cassuto, A Commentary on the Book of Genesis, Jerusalem, 1961–1964, pt. 1: From Adam to Noah): Աստվածաշունչ մատյանում հստակ նկարագրված չէ այդ նշանը, սակայն դրա վերաբերյալ տարբեր տեսակետներ են առկա: Այսպէս՝ մասնագետներից ոմանք կարծում են, որ Աստծու անեծքից հետո Կայենը բորոտությամբ է հիվանդանում, ուստի այդ ախտի ժանտ վերքերն էին նրա նշանը, որի պատճառով եղբայրասպանը մերժվում ու հալածվում էր բոլորի կողմից: Ըստ Թալմուդի (Հնգամատյան) առաջատար մեկնաբաններից մեկի՝ Շլոմո Յիտթակի՝ այդ նշանը, հավանաբար, Բարձրայի անվան տառերից մեկն է եղել, որը եւ դրոշմվել է Կայենի ճակատին:

Աստված Կայենին չպատժեց՝ նրա կյանքը խլելով, այլ թույլ տվեց, որ շատ երկար ապրի՝ մշտապես սահմնելուցից երկյուղ զգալով, տեղից տեղ փախչելով եւ բոլորի ատելության դառնությունը ճաշակելով...

Կայենը հեռանում է Աստծու մոտից եւ բնակվում Նայիդ երկրում՝ Եդեմի դիմաց: Իրականում Աստված չի հալածում Կայենին, այլ նա ինքն է փախչում՝ անդադար տառապելով մահվան շնչավոր երկյուղից: Չարիք գործողը, ըստ էության, սարսափում է ծիշտ նույն հատուցումից. իր մեծին արյունը հեղողը միշտ մտածում է, որ իր արյունն էլ կթափվի մեկ ուրիշի ձեռքով (հմմտ. Ծննդ. Դ 6): Ըստ ավանդության՝ երբ Կայենը թաքնվում է Աստծուց (հմմտ. Ծննդ. Դ 14), սկսում է առաջվել սաստիկ զգալ անեծքի աղեցցությունն ու հետեւանքները: Դ. Շեդրովիցկին գրում է՝ որքան շատ ժամանակ էր անցնում, այնքան եղբայրասպանն ավելի էր սարսափում՝ հետապնդվողի մոլուցքով ախտահարված, փախչում է իր իսկ հիմնադրած Ենոք քաղաքից, թաքնվում անտառներում, եղեգնուտներում, ծածկվում կենդանիների մորթիներով... Նա վախեցնում էր իր իսկ խոսքերի իրականացումից՝ «... ով հանդիպի, կսպանի ինձ» (հմմտ. Ծննդ. Դ 14. տե՛ս Դ. Յ. Վեդրովսկի, Введение в Ветхий Завет. Пятикнижие Моисеево, Москва, 2003): Ծննդոց Դ գլխից հետո այլեւս տեղեկություն չենք գտնում Կայենի եւ նրա մավան համագամեցների վերաբերյալ: Տեսակետ կա, որ նա սպանվում է իր թռռած ձեռքով, որը կոչը եր:

Պատմությունը չի մոռացել նաեւ Հուդա Իսկարիոփտացուն (ըստ որոշ մեկնությունների՝ «Իշ Կարիոթ»՝ մարդ Կարիոտ քաղաքից), որն արծաթասիրության, ուրացության, մատնության եւ ստոր դավաճանության մարմնավորումն է: Նա ինքն է գնում քահանայապետների եւ օրենսգետների մոտ ու առաջարկում Քրիստոսին մատնել. «Ի՞նչ կկամենաք ինձ տալ, որ ես նրան ձեզ մատնեմ» (Մատթ. ԻԶ 14–16): Ուշագրավ է, որ Հովհան Ոսկեբերանը, խոսելով Հուդայի մասին, դավաճանությունը որակում է որպէս անձնական հատկություն... ոչ թե զուտ արարք կամ գործողություն, այլ անհատի հատկություն՝ որոշակիորեն ձեւավորված հոգեվիճակ: Ըստ այսմ՝ միայն գործողություն կամ արարք կատարողը չէ դավաճան, այլ նաեւ նա, ում բարոյական գիտակցությունն ու ընկալունեքը խեղվել են, ով հոգով ու մարմնով արդեն իսկ վաճառվել է, ով իր ներսում ոչնչացրել է բարոյական բոլոր արժեքներն ու արգելքները: Այսինքն՝ Հուդան, մինչ մատնության համբույրը (հմմտ. Դուկ. ԻԲ 48), արդեն դաւաճան էր: Քահանայապետները Հուդային խոստանում են տալ երեսուն արծաթ (հմմտ. Մատթ. ԻԶ 15): Ուշագրավ է, որ Հին Կտակարանում երեսուն արծաթի վերաբերյալ տարբեր վկայություններ կան: Այսպէս՝ Ելից գրքի ԻԱ 32-ում երեսուն արծաթը ստրուկի արյան գինն է, մարգարեություններում՝ մշակի մեկ տարվա վարձը (հմմտ. Զաք. ԺԱ 12): Իսկ Հուդայի նենգ արարքից հետո այն դառնում է «մատնության գինը»:

Մատնության մասին հայտնում է Ինքը՝ Հիսուս Քրիստոս, վերջին ընթրիքի ժամանակ. «Ճշմարիտ, Ճշմարիտ եմ ասում ձեզ, որ ձեզմից մեկն ինձ մատնելու է» (Հովհ. ԺԳ 21): Եվ երբ աշակերտներից յուրաքանչյուրը հարցնում է Նրան՝ «Միթե ես եմ, Տեր», Աստծու Որդին պատասխանում է. «Ով իր ձեռքն ինձ հետ պնակի մեջ մտցրեց, նա է ինձ մատնելու: Մարդու Որդին կգնա այս աշխարհից, ինչպես Նրա մասին գրված է, բայց վաղ այն մարդուն, ում ձեռքով կմատնվի մարդու Որդին: Ավելի լավ կլինեք նրա համար, եթե այդ մարդը ծնված չլիներ» (Մատթ. ԻԶ 23–24):

Ուշագրավ զուգահեռներ արձանագրեմք: Ինչպես Աստված կանխավ գիտեր Կայենի չար մտադրության ու անմեղելի արարքի մասին, այնպես եւ Քրիստոս գիտեր Հուդայի մատնության մասին: Երբ Աստված Կայենին ասում է. «Հանգիստ եղիր, դու կարող ես մեղքից ազատվել, դու ի վիճակի ես այն հաղթահարելու» (Ծննդ. Դ 7), նրան մեղքի ծիրաններից ազատվելու, ապաշխարելու հնարավորություն է տալիս: Նույնպես եւ Քրիստոս, թեւ գիտեր՝ ով է իրական մատնիչը, սակայն որեւէ մեկի անունը չի մշում, իսկ «...ձեզմից մեկը մատնելու է ինձ» խոսքերով մինչեւ վերջին պահը հնարավորություն է ընձեռում Հուդային հետ կանգնելու իր չար մտադրությունից: Աշակերտների հարցին, թե ով է մատնիչը, Տերը պատասխանում է. «Նա է, որի համար ես այս պատառը կթաթախեմ եւ կտան իրեն»:

Եվ թաթախելով պատառը՝ տալիս է Իսկարիոփտացի Հուդային» (Հովհ. ԺԳ 26): Ըստ հնագույն ավանդույթի՝ հրավերքի ժամանակ պատառը որեւէ մեկին տալը բարեհաճության, պատվի եւ գնահատանքի նշան էր համարվում: Այսպիսով՝ պատառը Հուդային տալով՝ Քրիստոս փորձում է փրկել նրան կործանումից: Սուրբ Գրքի մեկնիչներից ոմանք կարծիքով (օրինակ՝ Սարգիս Կունդի)՝ Քրիստոս պատառը թաթախելուց հետո է տալիս Հուդային: Այսինքն՝ թաթախմանը խորհրդանշորեն մաքրվում, սրբվում են աստվածային այն շնորհները, որոնք տրվել էին Իսկարիոփտացուն:



ամեն գնով ավարտին են հասցնում իրենց իրեշավոր մտադրությունները:

Չնայած Հուդայի մասին սուրբգրային վկայությունները խիստ համառոտ են, սակայն ավետարանական որոշ տեղիներ ընթերցելիս հստակ պատկերացում ենք կազմում նրա էության, բնավորության գծերի ու խառնվածքի վերաբերյալ: Օրինակ՝ ավետարանիչները նկարագրում են, թե ինչպես է Մարիամ Մագդաղենացին ազնիվ մարդու թանկարժեք յուղով օծում Քրիստոսի ոտքերը, իսկ Հուդան այս առնչությամբ բացահայտ ցույց է տալիս իր դժգոհությունը (հմմտ. Մարկ. ԺԴ 3–5, Հովհ. ԺԲ 3–5):

Մայր Աթոռ Սուրբ Էջմիածնի գահակալների ավանդը Մեծ եղեռնի նահատակների հիշատակի հավերժացման գործընթացում



← էջ 3, 5

Ապրիլի 24-ը հռչակվեց «Յիշատակ Սրբոց նահատակաց, որք կատարեցան յընթաց Ցեղասպանութեան Հայոց վասն հաւատոյ եւ վասն Հայրենեաց»: Որից հետո տեղի ունեցան Հայոց ցեղասպանության նահատակների սրբապատկերների քողազերծումը եւ օրհնությունը: Ամենայն Հայոց Կաթողիկոսն ու Մեծի Տանն Կիլիկիո Կաթողիկոսը հետո սրբալույս մյուռնով օծեցին երկու սրբապատկերները (օծված

սրբապատկերն ապրիլի 24-ին երկրպագության դրվեց Ծիծեռնակաբերդում): Սրբադասման արարողությունն ամփոփվեց Ամենայն Հայոց Կաթողիկոսի եւ Մեծի Տանն Կիլիկիո Կաթողիկոսի՝ Հայոց ցեղասպանության սուրբ նահատակների բարեխոսության հայցով, եւ ապա, սրբադասման պատմական առիթով, Ն. Ս. Օ. Տ. Տ. Գարեգին Բ Ծայրագույն Պատրիարք եւ Ամենայն Հայոց Կաթողիկոսը եւ Ն. Ս. Օ. Տ. Տ. Արամ Ա Մեծի Տանն Կիլիկիո Կաթողիկոսը իրենց

հայրապետական պատգամը հղեցին աշխարհասփյուռ հայությանը:

Սրբադասման արարողության ավարտին՝ ժամը 19:15-ին (պատահական ընտրված ժամ չէ, այլ խորհրդանշում է 1915 թվականը), ազդարարվեց լռության ռուպե, ապա Մայր տաճարի, աշխարհի գրեթե բոլոր հայկական եկեղեցիները եւ քրիստոնեական քույր եկեղեցիները հնչեցրին 100 գույժ-ղողանք, որին հաջորդեց տոնական ղողանջը՝ ի պանծացումն Հայոց ցեղասպանության սուրբ նահատակների:

Այս հոգեզնայլ եւ հրաշափառ միջոցառումներով, հիրավի, ամբողջացան Մեծ եղեռնի նահատակների հիշատակի հավերժացման ձեռնարկումները, եւ երջանկահիշատակ Վազգեն Առաջին Հայրապետի մարգարեական խոսքերի համաձայն՝ այդ օրը «Հայ ժողովուրդի զաւակները, որ ի Հայաստան եւ ի սփիւռս աշխարհի... երկիւղածութեամբ կը խոնարհին բիւրաւոր նահատակներու անյայտ գերեզմաններուն առջեւ ու կաղօթեն անոնց անմահ հոգիներու խաղաղութեան եւ երանութեան համար: Եւ կը վերանորոգեն իրենց ուխտը՝ սուրբ պահելու անոց նուիրական յիշատակը ու մնալու հաւատարիմ անոց լոյս հաւատքին, անոց հերոսական ոգիին, հայոց ազգը մէկտեղուած եւ հայոց ամբողջ երկիրը փրկուած տեսնելու անոց պայծառ երազին»:

Այսպիսով՝ Հայաստանյայց Առաքելական եկեղեցին, հավատարիմ իր ազգային եկեղեցի լինելու եղանակը եւ սեփական ժողովրդին բաժին հասած ցավերին ու ար-

հավիրքներին միասնաբար դիմակայելու իր առաքելությանը, եւս մեկ անգամ ապացուցելով իր ազգային եկեղեցի լինելը՝ ձեռնամուխ եղավ Մեծ եղեռնի նահատակների հիշատակը հավերժացնելու եւ հավուր պատշաճի մշտնջեն գործին: Հայ Առաքելական եկեղեցին՝ ի դեմս Մայր Աթոռ Սուրբ Էջմիածնի, որպէս որդեկորույս, սգատեր մայր, բայց ոչ երբեք եղբրամայր, ամեն ինչ արեց կորույս ազգականների խնկելի հիշատակը իբրեւ նահատակների կրօնական սգատուն պատշաճորեն մշտնջեն գործում: Հայոց եկեղեցու եւ Մայր Աթոռի առաջին ոգեկոչումները, իբրեւ մայրական սիրո եւ գուրգուրանքի արտահայտություն ու որդեկորույս ծնողների՝ զավակների հանդեպ հիշատակի, սգո եւ հարգանքի տուրք, մվիրված են եղել Մեծ եղեռնի օրերին նահատակված հայ մտավորականների եւ հոգեւորականների հիշատակին: Հետագա անբարենպաստ ներքաղաքական ու աշխարհաքաղաքական իրադրության պայմաններում, բազմաթիվ փորձություններ ու խոչընդոտներ հաղթահարելով, երախտավոր Մայր Աթոռը, հանձնա իր հայրենասեր-որդիասեր, շրջահայաց ու ողջամիտ գահակալների, կարողացավ միս ու արյուն տալ, իրականացնել իր հոգու զանձատունավանդատան մեջ անթղթված մվիրական երազանքն ու ծնողական պարտքի քյուրեղացումը՝ Մեծ եղեռնին զոհ գնացած զավակների հիշատակի հավերժացումը:

Արման ՄԱՆՈՅԱՆ
Պատմական գիտ. թեկնածու

Մուշեղ Գալշոյան

← էջ 4

Թշնամու՝ Մեհմետ Էֆենդու առջեւ կանգնած Թորոսը, զայրույթից կրակ կտրած, մերկ մատներով վառվող ածուխ է մոտեցնում նրան. «Կրակը ցուցամատով ու միջնամատով բռնած, մոտեցավ շեհիտին. «Վառե քու դայլոն, աղա,— ոստիկանապետը ետ-ետ գնաց... Թորոսը սուր մայլուն էր շեհիտի աչքերի մեջ,— վառե, աղա...»:

Նույնը հանդիպում է մաւել Բելովի «Հյուսիսային պատմություններ» վիպակում. «Կոզոնկովը պարտք ուզեց, գրպանից լուցկի հանեց: Չոթացրեց, կացրեց: «Չէ, Կոզոնկով, ես քեզ պարտք չեմ տա»,— ասաց Ֆեդուլյոնովը <...> վառարանից մի ածուխ հանեց, դրեց բռի մեջ ու ծխախոտը կացրեց: «Այ, ասաց, Կոզոնկով, երբ որ մարդավարի կացնել սովորեցիր, էն ժամանակ էլ կգաս: Մի խոսք չեմ ասի, վերջին ունեցածս կտամ»:

Երկու դեպքում էլ պատկերն օգտագործված է ընդգծելու հերոսների կամքը, դիմադրության պատրաստ ներքին հզոր ուժը: Սրանք, իհարկե, ընդհանրության մասնավոր դեպքեր են, կարելի էր բնաշխարհին ու բնաշխարհի մարդուն մայվող հայացքի ուղղությունն է, որը եւս ընդհանրությունների մեծ շրջանագիծ է ծրու՝ հենակետեր ունենալով ապրելու բարոյականությունը, սովորույթներն ու կենցաղը, միասուկացն ու լեզուն, բնության հետ ունեցած դարավոր կապերը:

Սիւս տեսական եւ ստեղծագործական այս շրջագծով էլ ճանապարհ է բացվում դեպի Մ. Գալշոյանի գեղարվեստական աշխարհը (Մ. Գալշոյանի գեղարվեստական երկերի վերլուծությունը տես նաեւ մեր մյուս հոդվածներում)՝ «Հիշատակների երկիր» եւ «Հիշողությունը ընդդէմ մոռացության»՝ գեղարվեստական «Ժամանակ եւ շարժում» (1984), «Հեղինակի աստղը» (1988) գրքերում):

Մ. Գալշոյանի առաջին գիրքը խորհրդանշական վերնագիր ունի՝ «Կռուկ»:

«Կռուկ, մեր աշխարհին խապրիկ մը չուցիս» երգի այս տողը չի ասվում, բայց բոլոր հերոսների հոգեբանությունը ներծծված է այդ զգացողությամբ:

Անցյալ դարձած ժամանակների վերհուշի, ապրած օրերի հաստատման, պայծառ



կարոտի եւ անսկիզբ ու անվերջ մի տանջալի թախծի տվայտանքներով է գրված ամբողջ գիրքը: Փոխվում են ժամանակները, փոխվում է կյանքը, բայց մարդիկ ապրելու հոգեբանական հենակետեր են որոնում եւ ապրում իրենց կորուստներով ու երազին պահ տալիս կորստի հիշողությունը, ապրում անցյալի կարոտով եւ ապավինում հույսին ու սպասումին: «Կռուկ»-ն ասես շարունակվում է ճիշտ այն տեղից, որտեղ կանգ առավ Բակունցը, որտեղ վերջանում է «Ծիրանի փողը»: Սիւս Հագրոյի երազանքը. «Հաղ մի երթամ տեսության մըր քարերին, մըր ձորերին, մըր Մարութա բանձր սարին: Առնիմ զիմ ծիրանի փող, ժողվիմ մարդերու, մատնեմ անուշ խոտերու վրեն, հանց գառներ մարդիկ մատնեմ իմ չորս բոլոր, երգեմ էնոնց խաղաղության զիմ երեգեր, մարդիկ հալալ-զուլալ ախպրտաց պես գրկեն գիրար, չեղնի ոչ տեր, ոչ մշակ, ոչ թուր, ոչ բռնություն: Փչեմ զիմ ծիրանի փող, էման ծուխ բանցրանա երդիկներեն, խմեմ մըր լուս աղբըրներեն, զիմ քրտինք կաթա մըր քարերու վրեն, մըր Մարութա բանձր սարի ամպ թող լիզա զիմ սիվտակ ոսկորներ»:

Սասնա ճույն բնաշխարհն է Մ. Գալշոյանի հերոսների աչքի առաջ եւ այդ բնաշխարհի մարդիկ, որոնց կյանքն անցել է կրակների ու կրակոցների միջով:

Գործերից առաջինը «Ձորի Միրոն» վիպակն է: Աշխարհում ունեցած իր միակ եր-

ջանկությունը՝ միմուռար որդուն, Միրոն ճանապարհ է դնում բանակ՝ պատերազմ: Վիպակը զարգանում է հերոսի ներքին խոսքի աստիճանական ծավալմամբ: Ստեղծվում է բովանդակության երկու հուն՝ վերհուշի եւ դրանից բխող մտահանգումների, որոնք՝ որպես կենսափորձից ծնված խորհուրդ, հայրը ժառանգում է որդուն: Բացվում են Ձորի Միրոյի կյանքի փակագծերը, ապրած տարիները շողախի պես լցվում են նրա ու որդու միջեւ եւ նրանց ծուլում իրար այնպես, ինչպես հնագույն բերդերի վեմեր, որ փլատակվելիս անգամ անբաժան են իրարից: Միրոյի միտքը թափառում է կորցրած ծննդավայրում եւ հուշ դարձած հարազատների պատկերների միջոցով վերակոչում պատմությունը:

Սիւս հուշերի մշուշի մեջ երեւում է Հարութ պապը՝ բաղը ուսին, ծաղկած ծիրաններում հենված: Բայց եկել էր պահը, եւ Հարութ պապը պետք է մեկնեւ այս աշխարհից: Միրոյի վերհուշի մեջ ծիլ է տալիս այն տարիների հիշողությունը. «Առավոտ էր, ամեն մեկն իր բան ու գործին, ինքը կանգնել էր ընկուզենու տակ, մայլուն էր պապին, մտել էր գլուխն ու դուրս չէր գալիս. էսօր Հարութ պապը աշխարհից կթողնի, կերթա... Ու սիրտը ցավում էր. ինչի՞նչ էրթա, իր այգին թողնի ղր էրթա... Մնա, մամր, մամր փոր անի ծառերի տակ, հոգին՝ մեջքը տա ծիրաններում, ծաղկաթերթեր կաթկթան գլխին ու կորչեն ճերմակ մազերի մեջ»:

Այսպես կամաց-կամաց Միրոյի աչքի առաջ բոլորը հեռանում են աշխարհից՝ մի հարս խանդութ, մի կողակից Նարե, անուն առ անուն մի ամբողջ գերդաստան: Այսպես ամբողջ կյանքում ապրել է Ձորի Միրոն՝ երազի մեջ պահած հեռու մի երկիր, մի տխրամած կարոտ, որն իր եւ իր ցեղ ու տոհմի անցյալն է: Այդ անցյալն էլ անընդհատ նրա մեջ ոգեկոչում է հեռավոր պատկերներ: Իսկ այդ անցյալով նրա ներկան ապրում է այնքանով, որքանով կա Հարութ որդին: Այդ անցյալի հավերժացման ձգտումն է, որ ամեն ինչ կորցնելուց հետո նրան ստիպում է ունենալ Հարութ որդուն՝ որպես Հարութ պապի կենդանի հիշատակ, որպես ցեղ ու տոհմի ապրող շարուն-

ակություն: Ծանապարհին Միրոն մի պահ կտրվում է անցյալից, ավելի սեղմվում որդուն եւ ասում. «Հարութ... Աշխարհը հող ու ջրից անուշ բան չկա: Մարդու ուժ հողի մեջ է: Քանի հող չեն խել ոտաց տակեն՝ մարդ անպարտ է, թեկուզ զարկվի՝ անպարտ է, խլեցիմ՝ գերի է, գառ»:

Հուշերը կրկին նրան տանում են հեռու, բացում կորստի անհատակ ողբերգությունը եւ որպես հերթական մի խորհուրդ՝ պահ տրվում պատերազմ մեկնող որդուն. «Հարութ, մարդ սպանելուց էլ հարկ է մարդ մարդ մնա»: Եվ հետո. «Հարութ, գառ, լսե ու մտախան չանիս, վիզ չծռիս, մահ չընդունիս կամոք: Կռվի քու մահվան դեմ. հաղթ եղար, կապրիս, չէ՝ մեռնել կա ու կա: Քու ձեռք ու ոտք կկապեն, սիրտ կապեղ չեղնի: <...> Հարութ, էն մարդ կամոք կընդունե մահ, ով վրեժ ու փափագ չունեն»:

Այսպես դրվագ առ դրվագ անցյալից վերընձյուղվում է Միրոյի ներկան, որը նրա ու նրա տոհմի պատմության կենդանի դասն է՝ առաջին հերթին բարոյականության օրենքներով:

Ամբողջությամբ կարոտի երգ է սա՝ հայրենի լեռ ու քարի, իրիկնահացի մտտող մի մեծ գերդաստանի եւ անցած ճանապարհի վերհուշով: Օրերից մի օր օտար երկրում Միրոն երկրացի էր տեսել, որը նրան ասել էր. «Միրո, իմ սրտի մեջ յոթ տարվա կարոտ կա, մեր Սասնա ձորերով մեկ կարոտ՝ գեղ ու գերդաստանի համար կա, սար ու ձորի համար կա, քար ու ծառի համար կա... Միրո, մեր երկրի գեղ ու զազանների, մեր երկրի օձերու համար էլ իմ հոգու մեջ կարոտ կա...»: Այստեղից արդեն Միրոն է ուղղակիորեն շարունակում եւ ասում որդուն. «Լսե, Հարութ, կարոտ գորեղ-գորեղ է, կարոտից գորեղ բան աշխարհք չկա: <...> Կարոտի հետ տխրություն կմեծնա, գառ... Կարոտ տխրություն է, անընդ-անուն տխրություն է: Ու եղ տխրություն... մարդու հոգին կմեծացնե, մարդու կդարձնե աժդահա, հերոս»: Սիւս կարոտի «փիլիսոփայությունը»՝ ըստ Ձորի Միրոյի կենսագրության:

Շարունակելի

Դավիթ ԳԱՍՊԱՐՅԱՆ
Բանասիրական գիտ. դոկտոր, պրոֆեսոր

ՌԱՓԱՅԷԼ ՊԱՅԿԱՆՑԱՆ (1830–1892)

← էջ 5

Թվում էր՝ ոչինչ չպիտի խանգարեր նրանց երջանկությանը. հարսանեկան զգեստները պատվիրված էին արդեն, երկու օր հետո էր պատկանությունը՝ եփրեն վարդապետի հետ պայմանավորված: Բայց ահա ուշ երեկոյան մի օտարական նրան հենց մոր հրաժեշտ տված Միքայելից հարցնում է Մարիի հասցեն: Հետո է պարզվում, որ անծանոթը Մարիի նշանածն է եղել: Հաջորդ օրը տարածվում է Մարիի մահվան բոթը. իրականացել էր «մահ թույնից» կանխատեսումը, իսկ ճշմարտությունը Միքայելին իմանում է թույն խմելուց առաջ իրեն գրած նրա նամակից. «Ներք ինձ, սիրական Միքայել, որ իմ բարեկամությունը, բացի վիշտ ու թախիծեն, ոչինչ չի տվել քեզ այս հինգ օրերը: ...Այժմ հասկանում ես, ամփոռ՝ երեխա դու, ինչու թախանձագին խնդրում էի քեզ գողանալ, փախցնել, բռնի կինդ շինել ինձ... դու չհոժարեցար առանց վայրկյան իսկ հապաղելու ինձ քո կինը դարձնել (ժամանակը շատ կարճ էր). ինձ կինդ անել քու ձեռքն էր, բայց քու հարսդ լինել էս չէի կարող — ես նշանած էի» (3, 80):

Մարիի իրական նշանածն այլևս չի երեւում, բայց Միքայելի բացառիկ պարկեշտության ու սիրո վերջին հավաստումը հաջորդ օրը Մարիին իր ձեռքով հողը դնելու պահին նրա դազաղի մեջ բոլորից թաքուն իր ողջ փողը «սպողեցուցած» հերոսի վերջին ինքնախոստովանությունն է. «Մարիի նման զանձը կորցնելուց հետո՝ ժամգոտ ոսկին ինչ արժեք պիտի ունենար իմ աչքում» (3, 80):

«Փառասերը» (1880) երկրորդն է վեպերի մեջ: Այստեղ առկա են ռոմանտիկների մախափրած երկու սուր հակադրություններ. մեկը՝ նույն Ալթմազովի ներքինն է արտա-

քինի հակադրությունն է, մյուսը՝ հակադրությունն է Ալթմազովի եւ Սուսանայի միջեւ:

Առաջին հակադրությամբ Պատկանյանը մի կերպարով լուծում է երկու հիմնախնդիր. առաջին՝ հայ մարդն իր ազգային բնական որակներով ինչ առավելություններ ունի եւ ինչ հրաշագործությունների է ընդունակ, եւ երկրորդ՝ ինչպես է նա իր փառասիրության ու անձապաշտության պատճառով չարիք դառնում թե՛ իր եւ թե՛ ազգակիցների համար:

Ըստ որոշ ակնարկների՝ Ալթմազովի բնական առավելությունները՝ խելացիությունը, բանիմացությունը, բարեկրթությունը, սիրունությունը նախատիպ Քերովբե Պատկանյանին են: Նկատելի է, որ Պատկանյանն իր հերոսների դրական կամ ժխտական հատկանիշները ներկայացնում է ոչ միայն հեղինակային դիսկուրսով, այլեւ մյուս՝ հատկապես այլազգի հերոսների՝ նրա նկատմամբ վերաբերմունքով: Առաջին անգամ հանդիպած համալսարանի պրոֆեսորը, ինչպես նաեւ անգլիացի, ֆրանսիացի, գերմանացի կանայք զարմացած են Ալթմազովի բարեկրթությամբ, շարժունակությամբ, մտացիությամբ, երաժշտական ունակություններով:

Պրոֆեսորը, օրինակ, ասես «Ֆիդիասի կարկինով գծած» համաշափություններով Ալթմազովի հետ առաջին գրույցից հետո ցնցված է. «Այս ինչ սատանա էր, խելքս չի հասնում. այդ ինչ մարդ էր, որ ես տեսա — իշխանագն էր, թե ավազակապետի որդի. այսքան հպարտություն, այսքան արտաքին շնորհք... Եվ այսպիսի որդիներ ունեցող ազգը հարյուրավոր տարիներ է ի վեր ընկճված է աղքատ, կեղտոտ, տխմար, տգետ, անճոռնի թաքարներե, քյուրդերե — անհասկանալի է» (3, 84):

Իսկ եվրոպացի կանանց հիացմունքն անցնում է բոլոր սահմանները: Երբ Ալթմազովն ինքնավստահ հպարտությամբ մեր-



ժում է իր ազգային պատկանելության վերաբերյալ բոլոր կարծիքները եւ միայն «թույլ ձայնով» հայտարարում, թե ինքը կովկասցի է եւ հայ, անգլիացի կինն Ալթմազովին լսելի բարձրաձայնում է. «Կովկասյան ցեղ որ ասում են, այդ ես շատ մոր կարգացի թայմզ լրագրի մեջ, ոչ այլ ինչ է, եթե ոչ հայերը, որոնց մտավոր զարգացումն, կատարելագործության ընդունակությունը եւ արտաքին գեղեցկությունը միշտ եւ համապագ գոված է եղել ամեն ազգերի մեջ: Եվրոպացիք իզուր առգրում են այդ հատկությունները վրացիներուն, կիսաթուրք-կիսամոնղոլ չերքեզներուն... այդ սխալ է... Հայտնի բան է, մի քանի ազգերի նախանձն է, որ քաղաքական դիտմունքները դրդված, պարզապես մերժում են եւ չգիտցողս ձեւանում են պատմական ճշմարտությունը: Փոքր Ասիայի ապագան, նույն եւ Սեաստապոլիս, այդ խոմ մեր լորդ Դերբին վաղուց ասել է, պատկանում է հայերին, եւ մեք մեքա մաղեսի երկու խոսքը հասկանալիս — «Ծանիր գեթ»» (3, 85–86):

Ինքնին հասկանալի է, որ հայերի մասին օտարների այս կարծիքները հենց Պատկանյանին են, որ նա ուղղում էր մոր սերունդ-

ներին: Նրանք, ինչպես Ալթմազովը, իսկապես չէին ճանաչում եւ չգիտեին իրենց արժեքը: Եվ հենց այդ էր նրանց թշվառությունների պատճառը: Ինչո՞ւ էր Երեւանի մահաճգի գյուղերից Թիֆլիս մեկնած, գիմնազիան գերազանցությամբ ավարտած Ալթմազովը հասել Պետերբուրգ, համալսարան ընդունվելու, բայց դա միջոց էր միայն, իսկ բուն նպատակը՝ հոր խորհրդով՝ ուրիշ: Նա պիտի գտներ չափազանց հարուստ ծնողների դուստր հարսնացու, ամուսնանար եւ ժառանգեր նրանց հարստությունը:

Պրոֆեսորի միջնորդությամբ Ալթմազովը հայտնվում է Կաթիլկինների տանը՝ նրանց զավակներ Միշայի ու Եվդոկիայի ուսուցչի կարգավիճակով: Բայց Ալթմազովը գործում է մուլքադար հոր խորհրդով եւ իր արտաքին հատկանիշների շնորհիվ կարծես ունենում է ժամանակավոր հաջողություն: Եվդոկիային հրապուրում է սիրո խոստումներով, նրա ծնողներից թաքուն՝ անգամ մատանիներ են փոխանակում: Իր հաջողությունը նա համարում է այնքան իրական, որ հորը նամակ է գրում. «Ամեն բան դեպի լավն է գնում: Իշխան Կաթիլկինը 40 000 օրավար հող ունի, բանկում 4 000 000 մանեթ մաղդ փող, եւ ոչ մի կոպեկ պարտք, իշխանական պահարանների մեջ 500 000 մանեթի ակնեղեն, ոսկե զարդեր եւ արծաթե սպասներ ունի, իսկ աղջիկը ինձ վրա մինչեւ ականջները սիրահարված է» (3, 100):

Ուրեմն՝ ոչ ուսումը, ոչ գիտությունը, ոչ էլ սերն ու մարդը նրա համար արժեք չէին, այս հարստությանը տիրանալն էր նրա գերնպատակը:

Շարունակելի

Սամվել ՄՈՒՐԱՂՅԱՆ

Բանասիրական գիտ. դոկտոր, պրոֆեսոր


Նրանք մնում են որպես դավաճանության խարանք կրողներ

← էջ 6

Հովհաննես ավետարանիչը գրում է, որ Հուդան «...այս ասաց ոչ թե նրա համար, որ աղքատների համար էր հոգում, այլ որովհետեւ գող էր, եւ զանձարկող ինքն էր պահում, եւ ինչ որ այնտեղ դրվում էր, ինքն էր վերցնում...» (Հովհ. ԺԲ 6):

Հետաքրքիր մեկ համաձայնություն. Հուդան, չնայած տասներկու առաքյալներից մեկն էր, սակայն Քրիստոսին երբեւէ չի անվանում Տեր, այլ միայն «Ռաբբի»՝ Կարդապետ կամ Ուսուցիչ (հմմտ. Մարկ. ԺԴ 45, Մատթ. ԻԶ 25): Նրա դավաճանությունը կանխատեսված ու դիտավորյալ էր. «Սա զնաց բանակցեց քահանայապետների, օրենսդատների եւ ժողովրդի իշխանավորների հետ, որ Հիսուսին նրանց մատնի: Նրանք ուրախացան եւ խոստացան նրան արծաթ տալ» (Ղուկ. ԻԲ 4–5), այսինքն՝ դա պարզապես սխալմունք չէր:

Սեղանջումից հետո եւ Կայենը, եւ Հուդան հոգեկան ծանր ապրումներ են ունենում, որոնք կործանարար են լինում նրանց համար: Այսպես՝ Կայենն ապրում էր անկարագրելի սարսափի մեջ՝ ահ ու դողով, մշտապես վախենալով սեփական կյանքի համար: Իսկ Հուդան նույնիսկ իր դավաճանության անմերելի հետեւանքները գիտակցելուց հետո պատրաստ չէր իրական զոջման ու ապաշխարության, եւ ինքն է կայացնում իր դատաստանը (հմմտ. Մատթ. ԻԷ 3–5): Հուդայի «զոջումը» մտածելակերպի փոփոխության արդյունք չէր, այլ լոկ գործած մեղքի համար ափսոսանք (հմմտ. Մատթ. ԻԷ 4): Երկուսի դեպքում էլ մեղանջումից հետո նրանց պատում է Աստծու կողմից լքվածության, հուսահատության, մերժված լինելու հոգեմաշ զգացումը: Ահա այստեղ ակնհայտ է դառնում սատանայի «խաղը». գործողությունից կամ հանցանքի կատարումից առաջ սատանան այդ արարքը ներկայացնում է որպես բնական ու անմշան, իսկ մեղանջու-



մից՝ անկումից հետո այն ծանր ու աններելի է թվում: Չարը հմտորեն խաղում է զգացմունքների հետ՝ ստիպելով ենթարկվել իր կամքին, ինչը, ի վերջո, հանգեցնում է մարդու մարմնական ու հոգեւոր ոչնչացմանը:

Հուդայի մահվան մասին վկայում է միայն Մատթեոս ավետարանիչը: Մատնիչն ասում է քահանայապետներին ու ժողովրդի ծերերին. «Մեղանջեցի, որովհետեւ արդար այրումն մատնեցի» (Մատթ. ԻԷ 4): Վերջիններս քամահրանքով պատասխանում են նրան. «Մեր հոգը չէ, դու գիտես» (Մատթ. ԻԷ 4): Պատմական բազմաթիվ դեպքերով հիմնավորված իրողություն է դավաճանի արհամարհումն են մատնում, որոնց նա ծառայություն է մատուցել: Հուդան արծաթյա դրամները նետում է տաճարի մեջ ու գնում, կախում է ինքն իրեն (հմմտ. Մատթ. ԻԷ 5): Քահանայապետները, երեսուն արծաթ վերցնելով, որոշում են դրանք չզցել

տաճարի զանձանակը, քանի որ «արյան գին» են: Եվ խորհրդակցելով՝ գնում են բրուտի ազարակը՝ որպես գերեզման օտարների համար (հմմտ. Մատթ. ԻԷ 6–7): Այն հետագայում կոչվում է «Այյան ազարակ» (հմմտ. Գործք Ա 18–19):

Եվ հայրաբանական, եւ գեղարվեստական գրականության մեջ բազմաթիվ հեղինակներ են անդրադարձել Կայենի ու Հուդայի կերպարներին: Նրանց վերաբերյալ նույնիսկ ֆիլմեր են նկարահանվել, նրանց եղկելի արարքները տարբեր տեսանկյուններից ներկայացնելու փորձեր են կատարվել: Այդուհանդերձ, պատմության մեջ նրանք շարունակում են մնալ որպես դավաճանության խարանք կրողներ, չարիքի մարմնավորումներ: Ցավոք, այսօր եւս ծնվում են կայեններ ու հուդաներ՝ տեսակով եւ էությամբ թույլ արարածներ... թույլ բառի բոլոր իմաստներով... Ամերկբա է, որ դավաճանությանն առավելապես հակված են նրանք, ովքեր կամազուրկ են, մորթապաշտ, անհավասարակշիռ, ունեն անկայուն, «հեղինեղուկ» բնավորություն, մտավոր զարգացման ցածր մակարդակ, զուրկ են հոգեւոր ու բարոյական արժեքներից... Թույլ մարդիկ հեշտությամբ են գնում այդ զագրելի քայլին՝ իրենց առջեւ ծառացած խնդիրները կամ անձնական ցանկություններն իրագործելու նպատակով: Նրանք մշտապես փնտրում են բարդ խնդիրների դյուրին լուծումներ, ուստի նրանց համար ավելի հեշտ է դավաճանելը, քան հավատարիմ մնալն ու չդավաճանելը... Ուժեղ լինելն ամենեւին էլ հեշտ չէ, այնինչ թուլամորթ, տակամբ ու դավաճան լինելն ավելորդ ջանքեր չի պահանջում: Թույլ մարդիկ մաւսարափելի վախկոտ են... Ոճրագործությունից հետո նրանք տառապում են իրենց բնագրական վախերի պատճառով, ըստ էության, կորցնում են ամեն ինչ՝ չկարողանալով այլեւս ապրել ներկայումս, զրկվում են մաւս ապագայից եւ «շահում» միայն եղերական վախճան:

Արփին ԶԱՆԹԻԿՅԱՆ

Կարգալույծ է հռչակվել Սիփան վրդ. Գեւորգյանը

Ն. Ս. Օ. Տ. Տ. Գարեգին Երկրորդ Շարյագույն Պատրիարք եւ Ամենայն Հայոց Կաթողիկոսի հայրապետական տնօրինությամբ կարգալույծ է հռչակվել Մայր Աթոռ Սուրբ Էջմիածնի միաբան Սիփան վրդ. Գեւորգյանը՝ ծառայության վայրն ինքնական լքելու կարգազանց ընթացքի համար: Կարգալույծ եկեղեցականն այսուհետ կդասվի աշխարհականների շարքը՝ Արթուր Գեւորգյան ավագանի անունով:

Լրատվական նյութերը՝
Մայր Աթոռ Ս. Էջմիածնի տեղեկատվական համակարգի

ՔՐԻՍՏՈՆՅԱ ՔԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»

թերթի խմբագրություն

Գլխավոր խմբագիր՝

Աստղիկ Ստամբուլյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝ qristhay@etchmiadzin.am

astghikstam@gmail.com

web կայք՝

krishayas.wordpress.com

Ստոր. տպագր. 15.04.2021 թ.

Տպաքանակը՝ 1225